

**NATIONAL ASSEMBLY OF
SEYCHELLES**

Thursday 28th January, 2021

The Assembly met at 09am

National Anthem

Moment of Reflection

Mr Speaker in the Chair

MR SPEAKER

Bonzour tou Manm e tou lodyans an deor. Nou *item*, nou annan *First Reading* pou en *Bill*. Madam Clerk.

MADAM CLERK

Mersi Mr Speaker. Bonzour Mr Speaker. Bonzour tou bann Manm e tou dimoun ki a lekout. Nou pe fer *First Reading of the Appropriation Bill 2021*.

This Act may be cited as the Appropriation Act 2021.
Mersi Mr Speaker.

MR SPEAKER

Mersi Madam Clerk nou a prosede avek *Public Health (Amendment) Bill*. Onorab Georges eski nou pou? Wi ou'n pare pou adrese, wi.

HON BERNARD GEORGES

Wi Mr Speaker, me avan eski mon kapab ganny ou

permisyon pou mon demann ou en pri kestyon?

MR SPEAKER

Wi byensir.

HON BERNARD GEORGES

Wi bonzour. Mr Speaker mon'n remarke ki nou ti pou fer laranzman pou bann Manm ki pe asiz dan milye lasal pou zot annan en *podium*, si zot anvi entervenir bomaten.

E mon konpran ki enn de zot, zot to annan lentansyon entervenir lo *Public Health (Amendment) Bill*. Me mon war ki nou pa ankor fer sa laranzman.

Alor mon kestyon se premyerman eski i *still* lentansyon pou fer en *podium* avek en *mic* pou sa bann ki anvi entervenir?

E dezyenman ki prosedir eski n ou pou swiv bomaten dan lekspektasyon pou enn ou de Manm ki pe asiz dan milye i anvi fer lentervansyon lo *Public Health (Amendment) Bill* silvouple? Mersi.

MR SPEAKER

Eski ou'n idantifye lekel Manm deza ki anvi entervenir?

HON BERNARD GEORGES

Yes and no Mr Speaker. Mon konnen ki Onorab Bistoquet

par egzanp ki annan lentera dan sa *Bill* i pou anvi, e mon mazinan ki kekfwa i ankor annan enn de lezot.

MR SPEAKER

Eski mon kapab demann Onorab Bistoquet la avan nou komanse pou pran en plas laba deryer kot i annan en *micro* parey nou'n fer pou bann larepons *SONA*.

E Onorab *LGB* mon ti a zis dir pou lezot Manm ler i ariv ler zis sinyal mwan en pti pe avan, e nou a envit zot pou al kot *micro* deryer.

HON BERNARD GEORGES

Very good. Mersi Mr Speaker.

MR SPEAKER

Ok, apard sa?

HON BERNARD GEORGES

Apard sa, *podium* nou ava regarde taler dan *ABC*. Mersi.

MR SPEAKER

Mon a demann Madanm Clerk pou fer sas laranzman.

MR SPEAKER

Onorab Bistoquet silvouple pran en plas laba. Wi, Onorab Pillay.

HON SEBASTIEN PILLAY

Mersi Mr Speaker. Mr Speaker, mon pe zis konfirman avek ou si eski nou'n fin ganny en let ki'n *signify Cabinet Approval* pou sa *Bill*?

E dezyenman kan ki nou pou ganny bann detay sa Bidze sa gro liv, me ki safwasi pou vin sa *digital format* pou nou bann Manm kapab komans get li o pli vit posib? Mersi Mr Speaker.

MR SPEAKER

Wi nou'n gannyan let ofisyel sorti *State House* pou sa *Estimates, Bill*. E detay *Estimates* in ganny sirkile bomaten par Madanm Clerk lo *email*.

I vre ki letan i en pti pe zis, me selman mon pou envit bann Manm silvouple tyek zot *email* zot a ganny sa gro liv, met lo *pen drive* - lo zot *email*. Akseptab *Leader* Lopozisyon? Madanm Clerk ou ti a kontan eksplike *please*?

HON SEBASTIEN PILLAY

Mr Speaker i *ok, good*. Nou ava *sort out* avek Madanm Clerk.

MR SPEAKER

Thank you, i ok. Mersi Madam Clerk. Avek sa, eski mon a demann Onorab Georges si i oule *move* pou *waive Second Reading? Public Health (Amendment) Bill*?

HON BERNARD GEORGES

Yes Mr Speaker. Mersi Mr Speaker. Bonzour tou dimoun.

Mr Speaker anba *Order* 97(1) lo *Standing Orders*, mon oule *move* pou sispann *Order* 69 (1) pou permet ki *Public Health (Amendment) Bill 2021* i ganny lir en Dezyenm Fwa bomaten, malgre ki sa peryod 7 zour pa'n pase ant son Premye ek son Dezyenm *Reading*. Mersi.

MR SPEAKER

Mersi Onorab. Eski sa Mosyon i ganny segonde? Onorab Gervais Henrie.

HON GERVAIS HENRIE

Motion seconded Mr Speaker.

MR SPEAKER

Mersi. Eski nou a pran en vot lo sa Mosyon silvouple? Bann ki vot pour lev lanmen silvouple? Antretan, eski nou kapab demann Minis avek son delegasyon pou antre silvouple?

Mersi vot lo *waiving Second Reading* in ganny aprouve avek 29 Manm ki'n vot pour, 0 kont e 3 abstansyon. Mersi.

Byenveni Mrs Peggy Vidot Minis pour Lasante dan Lasanble, e avek Minis i annan Dr Jude Gedeon Komisyoner

Lasante Piblik, e Mr Frank Ally *Attorney Zeneral*.

E avek sa nou a pas lo Mosyon pou *Second Reading please?*

HON BERNARD GEORGES

Mersi Mr Speaker. Mr Speaker anba *Order* 69(2) nou *Standing Orders* mon *move* ki *Public Health (Amendment) Bill 2021* i ganny lir en Dezyenm Fwa. Mersi.

MR SPEAKER

Eski sa Mosyon i ganny segonde? Onorab Sandy Arissol.

HON SANDY ARISSOL

Bonzour Mr Speaker. Bonzour Minis e bonzour tou Manm. Mr Speaker mon ti a kontan Segonn Mosyon poze par Onorab Georges. Mersi bokou.

MR SPEAKER

Mersi Onorab Arrisol. Mosyon in segonde. Mon ava envit Minis pou prezant *Bill* avek Lasanble. Minis Vidot.

MINISTER PEGGY VIDOT

Mr Speaker,
Leader Lopozisyon,
Leader Zafer
Gouvernman,
Manm Onorab,

Manm piblik ki a lekout, bonzour.

Mr Speaker mon vin devan Lasanble ozordi pou propoz lamannman dan Lalwa Lasante Piblik otreman sit koman *Public Health Act 2015*, a en moman ki nou pei Sesel pe fer fas avek pli gran defi lasante piblik ki i'n deza konnen. Pandan sa dernyen lannen pandemik *COVID-19* in penetre nou lafrontyer, e in destabiliz nou fason viv. In sanz nou lavi, e in fors nou enpoz en kantite mezir kontrayan lo nou pep.

Mondyalman sa pandemi i ankor pe kontinyen avek sa menm viger ki i ti konmanse. Malgre tou nou zefor nou konnen ki i pou reste ek nou pou ankor en bon pe letan.

Fas a sa sityasyon Minister Lasante avek tou sipor Konsey Minis, ti a kontan propoz avek Lasanble serten lamannman enportan lo 2 seksyon nou Lalwa Lasante Piblik. Seksyon 26 ek seksyon 64.

Tou le de seksyon i konsern regilasyon ki Minis responsab pou Lasante i kapab fer, dan konteks Lalwa Lasante Piblik. Mr Speaker sa bann tel lamannman in ganny fer dan en kantite pei dan lemonn, pou anpes maladi enfekte propaze.

Nou panse ki sa bann lamannman pou fasilite travay Minister Lasante, Lotorite Lasante Piblik, Lazans swen Lasante e permet nou ganny laviktwar lo sa pandemik en pe pli vitman.

Zot pou osi prepar nou pou en lot pandemi ki kapab vini dan lavenir. Dan sa konteks, lamannman pe propoze ki Seksyon 26 i modifye. Seksyon 26 i fer provizyon pou Minis fer regleman oubyen regilasyon pou minimiz danze lentrodiksyon maladi kontazyez dan Sesel.

Nou pe propoze ki dan paragraf lentrodiksyon sa seksyon, oubyen dan *chapeau* parey bann Avoka i apel li, nou azoute ki sa seksyon i osi fer provizyon pou anpes propagasyon e transmisyon maladi kontazyez anndan Sesel.

Pli anba dan sa Seksyon sa lamannman pe propoze ki nou azout en seksyon, ki a fer provizyon pou Minis fer regleman oubyen regilasyon pou bann bezwen vaksinasyon koman en mezir pou konbat, kontrole, e anpes propagasyon maladi kontazyez, e otoriz lilitizasyon vaksen dan sa bann ka irzan.

Fodre dir Mr Speaker ki depi plizyer lannen, vaksen pe servi isi Sesel, avek enorm sikse koman en mezir prevansyon pou plizyer maladi. Bokou sa bann maladi in diminyen oubyen eliminen atraver vaksen.

Sa ki nou ti napa isi Sesel se en provizyon dan Lalwa pou fer li posib pou entrodwir en vaksen, oubyen en lot prodwi medikal pou konbat en maladi grav letan bann staz aprouvasyon sa vaksen, oubyen sa prodwi pa ankor konplete.

Me i annan levidans syantifik endiskitab ki sa vaksen, oubyen sa proze medikal i kapab sov lavi oubyen anpes maladi. Sa lamannman pou fer li posib pou fer regilasyon dan sa direksyon.

Aprezan Mr Speaker mon ti a kontan koz lo Seksyon 64. I absoliman nesaser ki tou sa bann mezir ki nou'n mete pou protez nou pep kont propagasyon COVID -19. E ki nou pep pe siporte dan son gran mazorite i aport rezilta ki nou swete.

Afen ki nou kapab aport laviktwar lo sa pandemik e kontinyen avek nou lavi parey avan. Sepandan akoz i ankor annan nou bann ko-sitwayen ki pa pe swiv sa bann mezir byen, i nesaser pou fer Lalwa morde e

enpoz sanksyon lo dimoun ki pa obeir Lalwa.

Sa lamannman pe propoze alor ki Seksyon 64, Lalwa Lasante Piblik lo regilasyon i amande pou otoriz Minis responsab pou Lasante fer regilasyon dan sirkonstans adisyannel.

Nouvo seksyon dan 64(a) pou otoriz kreasyon lofans lo sa regilasyon, e enpozisyon lanmann ziska R50mil, oubyen lanprizonman pou en letan pa plis ki 2an pou bann ki komet lofans anba sa Lalwa.

Nouvo seksyon 64(b) pou fer provizyon pou enpoz en lanmann, en lanmann *fix* pou okenn lofans an koneksyon avek sa Lalwa.

Nouvo Seksyon 64(c) i ava spesifye ki en dimoun ki pey son lanmann *fix* pa pou bezwen fer fas ek perseksyon ankour.

Mr Speaker sa lamannman in byen ganny reflesir. Dan labsans lezot mwayen pou fer bann mezir Lasante Piblik ki nou'n deza entrodwir pou vin pli efikas. Mon pe envit Lasanble pou siport sa lamannman enportan. Mersi Mr Speaker.

MR SPEAKER

Mersi Minis. Nou a prosede avek deba lo sa Mosyon.

Onorab Georges ou ti a kontan ouver deba?

HON BERNARD GEORGES

Mersi Mr Speaker. Mr Speaker mon ti ava prefere nou fer deba me avek ou lenvitasyon, mon ava ouver lasal. Mersi Minis, bonzour ankor enn fwa Minis, *Attorney Zeneral*, Dr Gedeon ek tou bann Manm isi e bann dimoun ki pe swiv nou dan lakour.

Mr Speaker mon krwar Minis in fer le pwen, e in eksplike egzaktaman akoz ki nou bezwen sa 2 lamannman dan Lalwa *Public Health*. E akoz sa i bezwen vin la dan en fason ase irzan. Me kekfw mon ti ava kapab azout enn ou de pti keksoz.

Nou kontinyen viv nou lavi, e nou'n toultan fer li san port en gran latansyon lo mezir LASANTE PIBLIK. E nou fer sa Mr Speaker akoz nou annan en Lasante Piblik ki tre efikas e akoz i efikas, nou pa zanmen asize pou nou port en pe latansyon lo nou sor. E ki mannyer dan nou pei nou sanse, ki napa okenn sa bann problem ki bann lezot pei i annan.

E sa mon krwar kredi i devret al non selman pour sa tim ozordi ki ansarz Lasante Piblik, me tou bann predeseser

avan ki'n fer sir ki nou pei in ganny eparnye avek bann problem, ki kapab *arise* swa anndan, akoz en mank lizyenn oubyen, ki kapab ganny enporte *from* deor.

E si nou regard nou Lalwa *Public Health*, nou ava vwar ki son *scope* i vreman, vreman, larz. I koz lo se sa Lalwa ki reglemant simityer par egzantp. Ki kote simityer pou ete, ki mannyer dimoun pou ganny antere, *postmortem*.

Se sa Lalwa ki reglemant lenportasyon zannimo, oubyen lenportasyon manze sorti deor, pou fer sir ki tousala i pa anmenn okenn maladi dan nou pei.

I reglemant karantenn par egzantp, ki mannyer en bato ki arive avek okenn lekipaz abor, oubyen pasaze ki annan en problem. Oubyen avyon ki annan en problem, kontazye ki pou arive avek zot.

E nou rapel dan lepase nou bann ki nou laz i en pti pe pli avanse, nou ti konnen ki karantenn ti lo Ile Aux Cerf. E sa landrwa ki ozordi son non i ankor karantenn, kot okenn dimoun ki ti okenn pasaze okenn lekipaz ki ti arive lo en bato, zot ti met en paviyon zonn, pou fer konnen i annan en maladi afektyez abor. E zot ti bezwen al laba.

Tou sa bann keksoz, ki mannyer pou anmenn en lekor ki'n, en Seselwa ki'n mor aletranze ki vin Sesel ki pou bezwen rapatriy son lekor. Tousala i vin anba sa Lalwa.

E set en Lalwa ekstrememan enportan. Me parey mon dir akoz i telman efektiv, akoz bann dimoun, e akoz bann dimoun ki'n desarz zot lobligasyon anba sa Lalwa in fer li telman byen pou plizyer zenerasyon, nou isi nou pa vremen zanmen arive pou asize pou remarke ki sanse ki nou sanse. Eksepte enn de fwa, annan defwa. Mon konnen ki sa in arive avek *HIV* ek la prezan avek *Hepatitis C*, mon mazin bann maladi ki kapab, ki ganny transmet.

E enn bann rezon ki sa Lalwa ti ganny amande e *updated* an 2015, zis avan eleksyon Prezidansyel, ti an Oktob 2015 ki sa Lalwa ti ganny *updated*. E se senkyenm Lasanble ki'n fer li, zot in bezwen pran kont serten keksoz ki ti'n arive dan nou pei ki vye Lalwa pa ti'n prevwar.

Par egzanp *HIV*, *HIV/AIDS* zot ti bezwen moderniz sa Lalwa, pou pran an kont serten nouvo fleo ki nou pei ti pe fer fas avek. E parey mon ti pe dir, tanzantan nou remarke atraver

en keksoz ki nou bezwen fer akoz sa Lalwa i la.

Par egzanp detrwa an pase mon rapel mon ti pe al an Afrik, e mon'n ganny en kestryon ki zanmen mon ti'n mazin dan mon lespri ler mon ti retourn Sesel. E mon ti ganny demande oli ou kart *Yellow Fever*?

Ou sorti *Zambia*, ou sorti *Kenya*. Oli ou pti *passport* zonn ki *WHO* i donn nou pou montre ki ou annan en vaksen kont Lafyev Zonn? E mon ti telman abitye pa vwayaz ek sa pti papye ki, avek sa pti *passport* ki mon'n bezwen al renouvle e pran en *booster dose* kot Twa Zonn, e ganny en nouvo pti *passport* zonn. Tousala i ganny reglemante anba sa Lalwa. E donk set en Lalwa ekstrememan, ekstrememan enportan. Sa sete premye keksoz ki mon ti anvi dir Mr Speaker.

Dezyenm keksoz sa, lo sa 2 lamannman parey Minis in dir nou bomaten, nou sityasyon lasante i toultan dinamik. E nou Lalwa i bezwen toultan fer fas avek bann nouvo evantyalite. E la nou annan devan nou en evantyalite ki nou pa ti'n prevwar, akoz Lalwa ziska prezan pa ti pe mazin en propagasyon entern.

I ti pe mazin anpes en keksoz ekstern antre dan pei.

Son laksan ti lo anpes dimoun ki deor ki pe antre dan nou pei anmenn en lenfeksyon.

Be i pa ti'n vreman mazine ki mannyer pou anpes apard ban mezir ase *blunt* ki annan dan Lalwa deza. E sa se karantenn par egzanp oubyen pou bann lepre, oubyen pour bann keksoz koumsa met zot apar dan sosyete pou zot pa kontinyen enfekte dimoun.

Me nou pa ti'n mazin vaksinasyon koman en metod kontrol lenfeksyon entern. E an menm tan, nou pa ti'n osi mazin kekfw vaksinasyon koman en mezir kontrol ekstern. E la toudenkou, nou'n vwar ki Minister Lasante e Departman Lasante Piblik, in fer fas avek 2 keksoz.

Enn ki mannyer i pou kapab kontrol dimoun pe antre pei, san servi en lenstriman *blunt* poudir ou pa kapab antre annan en *lockdown* konplet? Oubyen tou dimoun ki pou antre, pou bezwen al dan karantenn. E ki mannyer pou anpes propagasyon entern ankor enn fwa san en metod *blunt* parey en *lockdown* parey en karantenn.

E sa se vaksinasyon *obviously* ki donn ou en gran la souples, dan lafason ki ou pou kapab *manage* en pandemik, *manage* lafason ki en maladi i

propaze. E nou Lalwa pa ti'n prevwar aköz nou pa ti'n zanmen ariv dan sa sityasyon.

Etdonnen ki nou Lalwa toultan kou bezwen li dinamik, la Minis pe vin demann nou ozordi pe dir, annou entrodwir dan sa Lalwa pou permet zot fer li, zot in komans fer ki deza.

Me dan en fason ekstra legal si ou anvi, e la zot bezwen ankadre li dan en legalite, e donn donk en pouvwar anba Seksyon 26. En pouvwar Minis, Minis i annan pouvwar fer 5 keksoz deza anba seksyon 26.

Par regleman, par *regulations* sa i donn li en sizyenm pouvwar. E sa pouvwar se pou preskri ki vaksen i vin en lenstriman ki i kapab servi dan son larsenal lenstriman. Oubyen ki Dr Gedeon ek son Departman Lasante Piblik, i kapab servi koman en nouvo metod pour annan sa souples, pou les lafrontyer ouver.

E met en provizyon vaksinasyon si ou anvi, oubyen pou permet ki isi Sesel nou kontinyen kapab sirkile. Me avek en kondisyon vaksinasyon. Donk e sa mon krwar ki nou napa okenn problemm avek sa se deza bann metod ki pe ganny aplike.

I ava annan serten ki pou dir, e la mon pa pe anvi pran zot largiman. Me i ava enteresan

pou pran konsyan sa largiman ki en fwa ki pou permet vaksinasyon koman en metod kontrol, *the next step* se ki ou kapab fer vaksinasyon vin obligatwar dan senm serten sirkonstans.

E sa nou bezwen regard li tre byen. Mon pa partaz neserman sa lopinyon. Me set en lopinyon e ki nou pa kapab inyore. Minis in dir nou a plizyer repriz lo televizyon e nou'n enform Lepep Seselwa ki ozordi isi Sesel vaksinasyon i pa mandatwar. I en keksoz ki ou kapab pa, ou kapab refizye pou ou ganny vaksinen.

E sa i antre tre byen dan nou sistenm konstitisyonnèl dan nou pei. Me mon krwar nou devret konnen ki vaksinasyon koman en *tool* i kapab ganny servi dan en fason, ki serten dimoun i kapab krwar ki zot drwa pe ganny abize. Minis kekfwa oubyen Dr Gedeon ti a kapab vin lo sa - reponn sa pwen si i ganny souleve parey mon krwar i posib ki i pou ganny souleve.

Dezyenm keksoz ki Minis pe demann nou se ankor enn fwa *extend* bann pouvwar ki Minis i annan anba Seksyon 64. E i annan en long seri pouvwar Minis pou li fer *S.I.*, pou li fer par regleman oubyen par *regulations*. En long, long lalis A

ziska Q ki donn li pouvwar pou fer *S.I.* aköz parey mon'n dir Lalwa Lasante Piblik i en Lalwa ki kouver en gran panopli, en gran panopli keksoz.

E donk sa Lalwa li menm li aköz i en Lalwa ki tous preske sak domenn nou lavi toulezour san ki nou rekonnèt li. Me ler nou'n lir li nou vwar, Minis i bezwen annan en serten mezir pouvwar fer *S.I.* dan en fason pou li reazir avek bann keksoz ki arive san ki i bezwen a sak fwa vin isi dan sa Lasanble e demann permisyon pou fer li.

E 3 nouvo pouvwar ki nou pe, ki Minis pe demann nou azoute ozordi ki on krwar ankor enn fwa, mon pa krwar ki okenn dimoun pou annan okenn problemm avek sa. Premye se kree en lofans pou dimoun ki pa pe swiv bann konsiny Lasante Piblik, i komet.

Konmela la, i annan serten lofans ki zot kapab komet, nou bezwen rod sa en pe partou dan sa Lalwa, oubyen dan bann lezot Lalwa la. Sa ki Minis pe demann nou permisyon pou li kree en serten kantite lofans par egzanp, met *mask* dan landrwa piblik oubyen *social distance* oubyen *whatever*.

Oubyen si ou pe fer en keksoz ki ou pa devret pe fer anba Lalwa. Minis i anvi ki nou

don li pouvwar pou li kree sa bann lofans, ki annan pou fer avek bann reglemantasyon ki Lotorite Lasante Piblik i bezwen met devan nou, ki nou ti napa avan pou kapab *contain* sa pandemik. Sa ti premye.

Me dezayenman se ki manner sa bann lofans pou ganny dil avek. *Obviously* i pa pou posib pour ki sak fwa en dimoun i ganny arete i pa pe met en *mask* dan landrwa piblik, ki ou pran li ou bezwen anmenn li Kordgard. Fer antre en lofans dan *occurrence book*, ouver en *file*, pran *statement* anmenn li Ankour fer li zize, epi pou li ganny *fine*.

Nou sityasyon pe permet nou sa *luxury*. Alor etandonnen ki sa bann lofans, zot pa en lofans ki nesedit tou sa bann tralilala, sa ki Minis pe demann nou se don li pouvwar pou fer en *fixed penalty*. En en *fixed penalty* ki ler en Zofisye Lapolis oubyen en Zofisye ki ganny Dezinyen par Minis.

E i pe demann nou Lotorite pou li dezir serten dimoun osi, zot a kapab dil avek sa sityasyon *right there and then*. Donn en *on the spot fine*, en *fixed penalty*. E fini avek sa dan en fason pou kontrol labi ki serten dimoun. *Still notwithstanding* toulezour ki zot ganny dir pa fer en keksoz, i

annan ki *still* pe kontinyen fer li.

E trwazyenm keksoz Minis pe demann nou se, si i annan en *fixed penalty*, e en dimoun in pey sa *fixed penalty* i ganny desarze *from liability*. I pa pou kapab ganny pourswiv pou sa menm lofans pou anmenn li devan Lakour.

Donk vwala Mr Speaker sa ki Minis pe demann nou pou fer ozordi. E mwan lo mon kote, e lo kote nou *Caucus* napa okenn problem, avek sa bann mezir ki devan nou. O konter nou krwar ki i tre efikas. E nou ti a kontan remersye Minis, remersye Dr Gedeon. E remersye *Attorney Zeneral* ki zot in vwar sa nesosite dan Lalwa.

E ki zot pe anmenn sa devan nou ozordi, pou konble sa enn de landrwa kot nou Lalwa ti defayan. Mersi Mr Speaker avek sa detrwa mo mon remersye ou e mon reasir Minis ki i pour ganny sipor Lasanble lo sa mezir. Mersi.

MR SPEAKER

Mersi Onorab. Mon ti a envit bann entervenans ki swiv pou limit zot entervansyon pou 10 minit. Mon apel Onorab Clifford Andre.

HON CLIFFORD ANDRE

Mersi Mr Speaker. Bonzour tou dimoun, bonzour Minis ek ou delegasyon. Bonzour tou zabitan Anse Aux Pins ki pe ekoute, i menm annan ki'n anvoy mwan mesaz, me kekfw mon pa pou kapab pas sa lenformasyon oubyen demann sa bann klarifikasyon. Akoz i pa relevan avek sa ki nou pe diskite la bomaten.

Mr Speaker Minister Lasante i en Minister ki o lo azanda ozordi dan tou pei, si oule. E bann Minis Lasante ek zot bann dokter ek zot tim zot pe travay sanses pou zot fer sir ki zot pei i pa vin en viktim sa maladi ki pe pase, sa pandemi si oule ki pe pase dan lemonn.

Sesel nou tou nou fyer lafason ki keksoz pe ganny fer. E par anmenn en Lalwa parey i montre ki poudir ladministrasyon Prezidan Ramkalawan e Minis Lasante i annan en plan. E i pe anmenn sa bann plan Devan pou montre avek Seselwa lafason ki nou bezwen *tackle* bann sityasyon ki devan nou.

E pa zis kit li koman en problem e konplent, konplent pou sa problem. Me selman i annan de lamannman ki nou pe fer la, enn mon pwen i tous lo sa ki Onorab Georges in dir konsernan serten

konstitisyonalite konsernan serten sa bann *issues*.

Letan nou dir vaksinasyon, Minis wi. A plizyer repriz ou'n dir ki i pa mandatwar pou pran vaksen. Me letan nou get sa lamannman ki pe ganny propoze i lir koumsa, sa enn ki *(f) sub (1) sub-sub (f)* i dir "*the requirement of vaccination as preventive measures to combat control, treat and prevent the spread of infectious disease, and authorizing the use of such vaccine in emergency situation.*"

Alors sa Minis mon ti a kontan ganny en leksplikasyon e mon sir ki Lepep Seselwa ti a kontan ganny en leksplikasyon, ki mannyer sa pou ganny antreprann. Bomaten nou'n annan en miting *Bills Committee* e sa i en topik ki nou'n diskite.

Nou pe gete si ou dir i pa mandatwar me en legzanp ki mon a donneren dizon en dimoun i annan lentansyon pou li *apply* pou en *Taxi Drivers license* en *taxi license*. E enn bann kondisyon se si ou pa'n pran vaksen ou pa pou kapab ganny *license*.

Eski la pa i annan e klerman oubyen laspe konstitisyonalite '*Right to Work*' ki en Drwa Fondamantal anba nou Konstitisyon sapit 3 pou li

travay e li i anvi travay. E parey nou'n ganny dir la pandan sa pandemik nou pe dir pei i napa sa kantite resours, pou en dimoun al lo *welfare*.

Me sa dimoun si i oule fer serten travay ki posibleman sa regilasyon ki a sorti i kapab anpes li oubyen pa permet li fer serten travay. So mon ti a kontan kekfwa pep Seselwa i ganny en leksplikasyon en pe pli kler lo la letan nou pe dir ki nou oule travay.

Dezyenm pwen, nou'n tous lo seksyon 64 ki pe ganny amande. I annan bann ensersyon ki pe ganny mete ladan, e ladan se kreasyon lofans. E son penalti i pa plis ki R50mil oubyen 2an prizon.

Me selman letan nou get sa propozisyon ki pe vini, letan nou get sa enn dezyenm i dir ou pou permet fer en *fixed penalty*. Eski i pa donn en paramet par ki ou kapab fer en *fixed penalty*? Eski Minis prezan i kapab fer en *fixed penalty* ki R50mil?

Konmsi letan mon pe sey get sa mon pe war konmsi ki i annan serten pwen, mon konnen Minis pa pou fer en *fixed penalty* R50mil. Akoz i pa pou kapab administre fer sa *Fix Penalty* pa pou kapab kolekte R50mil deswit.

So eski ti a bon kekfwa nou ganny dir a en *fixed penalty of not more* osi ki 5san, *whatever the case maybe ok*. Me selman i ganny spesifye ki fer, ki menm si ou fer enn dan ou regilasyon R200 apre mon prezimen ou pou bezwen donn en dele letan pou li al peye.

Kote i pou al peye si i pou pey kot Lasante, Komisyoner Lasante oubyen i pou vin pey kot Lakour parey *Fix Penalty* transpor i ganny fer. So i annan en pti pe klarite ki mon santi i bezwen ganny mete. E pou pep Seselwa bokou zot, bokou nou anvi war nou pei sorti kot i ete, nou anvi retourn normalite, nou anvi retourn travay nou anvi retourn fer nou biznes.

Akoz bokou nou biznes pa pe marse ozordi. E nou pa pe kapab ganny kliyan ki antre dan nou biro. Oubyen dan serten kondisyon nou bezwen fer bann depans ekstra, me nou bezwen fer bann depans tel ki *rent*, saler i kontinyen reste ki nou bezwen fer.

So nou anvi war, normalite e nou kontan ki en Lalwa parey pe vin devan nou Lasanble ki a permet diskisyon. Demen letan en sitwayen i ava ganny touse par sa Lalwa. I a konnen poudir i ti annan en loportinite pou diskite e li osi i

bezwen an konform avek serten regilasyon.

Avek sa Mr Speaker mon ti a kontan remersye ou. Mersi.

MR SPEAKER

Mersi. Onorab Sebastien Pillay.

HON SEBASTIEN PILLAY

Mersi Mr Speaker bonzour Minis avek ou delegasyon e bonzour tou dimoun i a lekout. Mr Speaker mon pa pou repet bann pwen ki'n sorti.

Mon krwar a sa moman la ki nou ladan se ki nou bezwen a sa moman la ki nou ladan, se ki lenportans se ki nou kapab donn sa delegasyon ki la sa Lalwa ki zot bezwen. E ki zot kapab tourn dan zot travay, akoz zot annan en travay vreman enportan pou zot fer.

Ziska bomaten Mr Speaker mon ti'n, mon pozisyon sete mon pou siport sa Prozedlwa i ankor parey. Me selman enn de keksoz ki Minis in dir i fer mwan annan serten konsern e ki mon ti kontan ou adrese pou klarifye pou n ou.

I annan bann pwen ki'n ganny souleve par Onorab Andre ki bokou dimoun pe eksprimen vizavi a sityasyon vaksen. Mon krwar ou *wording* anler i fer li en pti pe restriktif dan lesans ki ou pe dir ki

vaccination i vin sort of the only requirements.

Mon pa konnen si i ti ava pli *palatable* si nou ti'n met *vaccination*, *“requirement of vaccination as part of preventive measures.”* Rather than zis si ki *vaccination is the only thing*. Konmsi ki i ava tir sa lenterpretasyon ki vaksinasyon *is the only way*, alors *therefore i lead to a mandatory* apre sa.

Apre dezyenman en keksoz ki ou'n dir bomaten Minis ki mon pa krwar sa i lentansyon vreman zot Lalwa. I pa pe donn permisyon pou fer antre en vaksen, ki i pa ankor *go through* bann *phases*. Sa ki pe fer se ki i pe dir ou poudir ou kapab annan *as part of* tou ou bann mezir ki ou pe pran, en vaksen.

E i enportan a sa pwen Mr Speaker pou nou tous lo sa size mandatwar, e konstitisyonalitye e bann *liberties*. Mon krwar deplizanpli lemonn pe entrodwir serten Lalwa ki pe sfer serten dimoun fer en keksoz san ki i obliz li fer.

Par egzantp si ou pou *travel* ozordi i dir ou bezwen pran en vaksen. Me si ou pa anvri pran sa vaksen, *then* pou pa *travel*. Si par egzantp oule travay dan serten *field* par egzantp koman en *carer*, koman en *caregiver* i dir ou bezwen

pran en vaksen. Akoz ou bezwen protez drwa lot dimoun.

Mon krwar nou bezwen konpran ki nou drwa fondamantal ki nou annan se *the right to life*. E *a right to life* i mars avek drwa lavi en lot dimoun. Si ou kapab enfekte en lot dimoun e i perdi son lavi, ou bezwen osi pe regard sa perspektiv.

So i annan tout en bann seri keksoz, ki mon krwar tou dimoun pe konsidere e personn pa oule fors okenn dimoun pou pran okenn vaksen. Me i esansyel ki nou servi tou metod a nou dispozisyon, pou nou kapab ki nou *overcome* sityasyon ki nou ladan.

E ki nou pei i komans vin prodiktiv, e nou tou nou komans nou retourn dan nou lavi normalman. So i pou enportan ki dan zot *Right of Reply*, oubyen dan zot *summing-up* e petet ler nou al *Committee Stage*, ki enn *from* en pwennvi legal *Attorney Zeneral* i klarifye sa *wording*.

E reasir tou dimoun ki sa *wording* pa pe okenn ka entrodwir en *mandatory vaccination process*. Me i pli to en fason ki *internally* prezan vaksen osi i vin en metod ki nou kapab servi, *as oppose to* avan sa ti zis ler en dimoun ti pe antre.

E mon krwar i enportan pou nou sible sa byen. Akoz si ou al Kenya i demann ou sa pei *yellow booklet* pou ou antre *Kenya, Yellow fever* e sa Sesel i deza annan enn sa ki nou napa se ki nou napa *within* Sesel.

E prezan annou mazine prezan nou ganny nou en lot sityasyon, en lot maladi ki devlope en *cluster* ki devlope meton i devlop lo en zil, oubyen lo en zil napa e lo en lot zil i annan. E oule met par egzanp en kordon sanniter otour sa zil. Oule protez bann zabitan lo sa zil.

So i bezwen annan bann mezir ki bann Lotorite Konsernen i bezwen met a zot dispozisyon. Akoz probableman sa ban mezir personn pa ti'n mazin lo la, avan ki nou ganny en sityasyon en lenfeksyon ki ti kapab *spread* osi vit parey sa enn ki nou pe gannye ozordi.

E mwan mon ti ava enplor Lasanble pour ki *whilst* ki nou bezwen fer serten deba lo sa size. E i enportan pou nou konsider li dan son, dan tout son konteks i osi enportan ki nou kapab donn bann zouti neser pour ki nou kapab *overcome* sa sityasyon. E parey nou toultan dir e kontrerman avek bann desizyon ki'n ganny pran yer.

Lo mon kote mon pou kontinyen siport tou mezir neser pou nou kapab *overcome* sityasyon COVID. E lo mon kote latab osi parey, e mon santi poudir Minis ou ava kapab donn nou serten klarifikasyon. Nou ava demann ou serten kestyon ki ava neser.

Me i neser ki nou ava annan sa bann desizyon legal, e sa bann dimoun ki la mon krwar zot *more than competent* pou zot kapab eksplike *from* en pwennvi *fine*. Ki pou mwan mon war li ase kler, kot in dir ou i en *fine of 50 thousand* mon pa pe war li dir en *fixed penalty* 50 mil me nou ava gete ki *Attorney General* i dir nou.

E mon dernyen pwen Mr Speaker se ki mon'n regard 2 lezot pei ki pou mwan in, akoz mon konpran en pti pe zot Lalwa mon'n viv laba mon'n etidye. Premyerman *Australie* ler mon'n regarde son lafason ki in fer li, *Australie* pe bouz ver annan serten lenstans kot pou asked serten servis oubyen serten ka travay.

Sa vaksen pe vin *part and parcel of* sa *process*, Langleter in sey bouz dan sa direksyon. Me in ganny en kantite *pushback* pou fer li *mandatory*. E mon krwar ou sistenm i en pe parey pou Langleter, i pou en pe

pli pre pou Langleter akoz en kantite nou sistenm Lasante Piblik i *model* lo la.

So mon ti ava sizere ki Minis nou klarifye sa byen pour ki nou Alez bann konsern ki ava annan dan bann popilasyon. E ki parey nou pe war la ozordi en kantite dimoun pe komans pran zot vaksen nou kontinyen.

E an konklizyon Mr Speaker mon pa kapab pa profite la vi ki Minis i la. Minis demann ou, enplor ou pou si posibil met ankor bann *vaccination sites*. Akoz i annan bokou konsesyon lo bann ki egziste konmela e i pe fer serten difikilte. So si ou ti kapab fer sa mon ti ava vremen apresye. Mersi Mr Speaker.

MR SPEAKER

Mersi Onorab. Onorab Gervais Henrie.

HON GERVAIS HENRIE

Mersi Mr Speaker. Bonzour tou dimoun. Mr Speaker COVID-19 i pe enpakte lo nou lavi dan lesans, ki i pe sanz fason ki nou enterakte avek kanmarad. Fason ki nou fer biznes e fason ki bann lenstitisyon i fonksyonnen.

E fason prezan ki nou pe reponn vizavi propagasyon sa viris dan lemonn. I fer ki dan serten kwen lemonn i pe lev

serten kestyon lo ki degre sa bann mezir ki ale ki i konmans mont lo lipye drwa endividi?

E sa i en pe kontinyasyon largiman fer par Onorab Andre ki *Chairperson Bills Committee*. E sa i en keksoz ki nou koz lo la bomaten. E mwan lo mon kote mon ava senpleman dir avek dimoun parske dan sa zafer COVID-19 la, bann mezir ki pe ganny pran i pe annan bann rezistans par bann diferan group.

Bon rezon, move rezon pou kestyonn en pe sa bann zafer ki pe pran me i pa premye fwa ki lemonn limanite i bezwen pran sa bann desizyon. Akoz dimoun fer fas avek diferan moman kriz.

Zis pran en legzanp resaman dan lemonn modern ki nou rapel byen nou tou nou anvi ankor rapel kot nou ti ete, le 11 Septanm letan Lanmerik ti ganny atake. Be depi sa ki'n arive? In annan serten mezir in ganny pran ki letan nou voyaze prezan nou bezwen tir soulye, nou bezwen tir sang.

E i annwiyan, mwan i fatig mwan en kantite. Akoz mon konnen mon pa en teroris, me selman mon bezwen fer, sinon mon pa pou kapab pas byen dan *Airport Dubai*.

So savedir annou pran li koumsa, se ki i annan bann

mezir koumsa ki bezwen ganny pran. Ki pa akoz Gouvernman i dominer, e i anvi mont pyetin lo nou drwa. Me selman an menn tan nou kosyonn, e bann dimoun ki annan pouvwar pou pran sa bann mezir pou pa al osi lwen, osi long zistans ki nou ale nou bezwen eksplik sa bann dimoun.

Akoz ki nou bezwen fer li e kominikasyon pou mwan i toultan enportan, byen koze i fer byen konpran. Pou donn en legzanp bann dimoun par egzanp i dir pe pran kot mwan, *firemen* pou bezwen vini antre kas laport pou sov lavi, be dan letan normal i pa pou fer sa. Si Lotorite pou bezwen antre i ava annan en warant, en fason fer.

Be la nou pe dil dan en moman *emergency*. E sa ki enteresan se ki par egzanp la ler nou selman nou pe entrodwir sa konponan vaksen. Serten pei zot in osi al osi lwen lo kestyon *acquire* propriyete, parski en sel kou ou annan en kantite dimoun ki ou bezwen met karantenn kote ou met zot?

So vwala dan moman yer letan mon'n koze mon'n bezwen dir avek pep Seselwa, ki mon kapab fer? So olye par egzanp ki, mon pa pe dir al pran, *acquire* propriyete. Me selman olye ki ban lotel pou vin sarz nou en gro sonm pou met

dimoun karantenn, lala zot bezwen demande ki mannyer mon kapab ede zot ava ofer zot lasanm.

Serten pei parey mon pe dir zot in komans mazin dan direksyon kot nou kapab *acquire* ou *motel* ou lotel pou en pe letan aköz nou bezwen sa ban kantite lasanm. Nou, nou pa ankor ladan, me selman i bann keksoz ki pe arive dan lemond.

Donk Mr Speaker i pwen ki mon anvi dimoun i reflesir lo la, sa bann mezir i bezwen ganny pran pou protez lavi, pour dibyen plis nou, plis nou dan kominote. Malgre nou rekonnèt lobzeksyon pou serten pti group i pe annan.

Me mon rezwenn lapel Dirizan Lopoziyon pour ki i annan plis sa bann *vaccination centers*. Aköz isi lo Mahe nou'n vwar i annan zis Anse Royale e Grand Anse Mahe. E mon swiv aktyalite tou le swar, gran laliny, lapli, soley sirtou pou bann dimoun par lao 60an. Pour kwa pa nou annan enn dan sak rezyon?

Mon krwar i ti ava ed bokou, en lot keksoz mon krwar ki osi enportan nou'n tann sa bann sif dan nouvel tou le swar. Mon konnen poudir i en size ki Dr Gedeon in deza adrese.

Me mon krwar *mapping* sa viris son *spread* dan kominote i pli byen nou donner apersi pli direk. Konbyen ka mon annan dan Mont Buxton? Konbyen ka mon annan dan tou distrik. Ki prezan i kapab annan en vizilans en pe plis irzan dan kominote.

Ler mon tande poudir en sel kou in monte dan Mont Buxton mon pou tant, mon a reste dan lakour mon pa pou oule al tro lwen aköz mon konnen i la otour mwan.

E i ava annan osi petet dimoun ki pe *keep an eye* pe pas bann komanter avek kanmarad. Met ou *mask*, lav ou lanmen, konmsi bann keksoz koumsa.

E en lot pwen Mr Speaker mon santi poudir i enportan. Minister Lasante pe fer son mye nou koman bann dirizan dan kominote, nou pe donn en koudmen. I annan bann antite sirtou bann ki annan en pe prive, fodre zot donn nou koudmen en pe plis.

I annan bann klinik danter ki ankor pe ouver. E letan nou pe koz lasante labous, risk pou partaz sa viris la i propaze i pli o. So zot bezwen fer sir zot lo menm paz bann dimoun ki pe vann manze.

Yer i annan en dimoun ki'n port a mon latansyon ki malgre in dir *take away* fermen, met *order*. I annan dimoun dan bis dan serten kwen lo Mahe ki ankor reste ouver.

E mon bezwen lev sityasyon *IOT*, en gro lizin pres 2mil dimoun pe travay laba. E mon pe enplor Lotorite Lasante pou regard sityasyon *IOT* en pe pre. E pour pran bann desizyon nesese. Parske bann dimoun ki pe travay *IOT* non selman bann *expatriate*, me Seselwa ki retourn dan nou kominote. E alor i en sitasyon ki mon krwar Lotorite Lasante i bezwen regard pre.

Donk Mr Speaker vwala sa bann pwen ki mon ti oule fer. E 100poursan mon pou donn mon sipor sa bann lamannman ki pe ganny propoze bomaten. Mersi.

MR SPEAKER

Mersi Onorab. Onorab Aglae.

HON EGBERT AGLAE

Mersi Mr Speaker. Bon zour Minis, Dr Gedeon ek AG's.

Mr Speaker mon osi mon pare pou mon donn mon sipor en lamannman parey e avek en Lalwa ki vreman enportan. E tou pei o mon'n, i bezwen konsyan e zot bezwen met zot

gard o, a tou repriz pou zot kapab protez son sitwayen.

E ozordi s Lalwa li menm ki ek son lamannman ki i pe antase avek i eparnye dan nou Konstitisyon. Sirtou Lartik 29, kot i dir 'ki Leta i rekonnnet drwa sak sitwayen, pou ganny proteksyon pou son lasante e zouir en pli o standar lavi. Lasante, fizik ouswa mantal. ‘

E 29(b) i donn osi pouvwat Minister Lasante pou pran bann mezir apropiye pou anpes, tret e kontrol bann lepidemi ek lezot maladi. Alors Mr Speaker mon konsyan poudir bokou pe ganny fer dan sa laliny depi *day one* ki sa lepidemi in frap nou Sesel.

Me osi mon santi ki malgre tou bann mezir nesese ki'n met devan ki pe ganny pran. *Still* nou war nou fer fas avek bann to lenfeksyon ki ase alarman.

E menm si nou pe koz avek en pep ki nou koz Kreol avek zot. Nou war poudir tandans i vin dan diferan fason, e la nou war ki i annan nesese pou pran bann mezir en pti pe pli ekstrenm. E menm parfwa si nou pa fer keksoz, ouswa nou pa met dan Lalwa dimoun pa anvi ekoute, ouswa pa tandé, ouswa zot pa oule swiv.

Mr Speaker i annan enn de konsern ki mon pa pou tro al

repet sa ki'n ganny dir. Me selman dan lespri serten dimoun ozordi nou konnen poudir ler nou pe koz vaksen, i en keksoz ki mon depi mon nesans, depi ler nou'n ne, bokou nou, nou'n resevwar bann vaksen nesaser pou protez nou kont bann diferan maladi e sa mon felisit Gouvernman e Minister Lasante ki sa pratik i ankor pe arive.

E ozordi sa vaksen ki nou, nou pe koz lo la, i en vaksen ki in annan bokou spekilasyon lo vaksen. E i annan bann sa ki nou apel bann *conspiracy theory* par deryer, ki fer ki i annan serten dimoun i tonm dan bann tandan kot bann lefe negativ ouswa bann lefe advers i pran lenkyetid, ouswa en lespas dan zot lespri, ki fer zot redwir zot konfidans.

E mon krwar i enportan ozordi pou nou kapab menm si lasyans pa ankor 100poursan, li menm li mon pou dir 100poursan, prouve son lefikasite, me selman nou'n vwar poudir i pou annan en benefis a lonterm, si zanmen in kapab ganny prouve poudir vwala sa prodwir, sa vaksen ki nou pe donner i pe ede.

Sa i en keksoz mon krwar ki i pou vin ek letan. Me an mezir ki nou napa letan, mon

pou dir nou napa letan, pou espere ki lapopilasyon i vin enfeksyez, e nou komans vwar plizyer dimoun perdi lavi.

So ki fason ki nou, nou kapab petet dan en fason syantifik e edikasyonnel fer ki dimoun i etabli en konfyans dan sa program. E ler mon pe koz program vaksinasyon diferan pei pe fer li dan sonm diferan fason. E osi annan pei ki pe eksprim zot konsern akoz zot pa pe ganny ase akse premyerman, e prodiksyon i limite.

E nou Sesel mon pou dir mersi pou zefor ki Minister Lasante in fer ki nou'n kapab resevwar nou bann lo vaksen ase vitman. Konpare avek nou bann frer lo Kontinan Lafrik, ki annan ki mon an kontak avek ki'n war poudir i annan ki nenk an Mars, menm Avril, menm apre ki zot kapab resevwar en program vaksinasyon ki pou *kick start* dan zot pei.

E sa i konsernen akoz nou pe vwar tandans lenfeksyon dan sa kontinan. E nou ki annan nou annan en lizye laba e osi nou annan bann relasyon avek sa bann pei, i kapab kre serten konsern pou nou. Swa serten baryer, sirtou lo domenn ekonomik ki kapab leve.

Alors sa i en bann konsern. E mwan mon swete

ki program, vaksinasyon ki Sesel in anbank lo la byensir i annan serten defi nou'n rekonnèt. E mwan mon ti a swete ki sirtou nou bann *Health Centers*, la mon get parey Port Glaud nou annan 2 *health centers*. Eski nou pa ti kapab servi?

Eski sa bann *staff* ki la pa kapab petet nou dir be *ok* pour sa 2 zour, ou 3 zour la nou pe entansifye program vaksinasyon pou pran dimoun ki dan sa rezyon pou entansifye. Akoz nou war poudir i annan serten konsern ki'n ganny leve. E si Minister ti kapab petet konsider sa osi ti ava byen *ok*. Pou nou *attain* sa lobzektif, poursantaz ki nou, nou swete nou kapab ariv lo en nivo *herd immunity*.

Lot keksoz petet ki mwan mon ti a kontan met devan. Eski nou pou al dan en laliny sa zafer mandatwar la? Akoz i annan pei parey Lanmerik ozordi, bann ekspert bann dimoun mon kapab dir bann *think tank*, pe komans *flag* serten keksoz la deor la. Pe konmans dir ou par egzansp, si ou pe vin travay ou bezwen en plas travay dan Gouvernman, Gouvernman pou egzize ki ou'n ganny vaksinen.

Si ou pe al parey bann *Mass Sporting Event* ou pou

bezwen vaksinen. Si ou pou bezwen petet en sit dan en restoran, eski ou pou bezwen ganny vaksinen? Pou al dan militer tousala.

So i bann keksoz mwan mon pe get li i pa pou mandatwar, i pa pou en mandatwar forse, me selman i pou vin en *sort of mandatory*. Kondisyon ki pou antase avek me selman i pa pou forse.

So eski nou, nou pou bezwen al dan sa direksyon? E eski nou pou bezwen osi met li dan regilasyon a lavenir, pour ki si i kapab petet pa ganny vwar poudir la mon enpoz lo ou en drwa ki Konstitisyon i garanti ou pou ou swazir.

Me selman mon pa anvi ki mon vini pou pran ou drwa konstitisyonnel osi pou fors ou pou fer en keksoz.

So mon krwar dan sa laliny nou bezwen plis refleksyon lo la. E osi nou mazin osi petet serten endividi ki li i annan son larelizyon, i annan son *belief*, ouswa i annan son kiltir, ki li i panse poudir be akoz in deza egziste dan sosyete, sa bann kalite dimoun, sa bann group dimoun parey.

Me eski par lefe ki li i pa pou kapab baze lo sa prensip ki li i annan, i pa pou permet li pou li petet ganny akse avek en

servis demen. Ouswa son rev ki li i ti a kontan vin dan en profesyon i ganny afekte akoz, i pa'n kapab petet swiv en program vaksinasyon.

Avek sa Mr Speaker mwan mon pare pou donn mon sipor sa lamannman. E mon swet lekip Minister Lasante ankor en bon travay dan zot travay difisil. E kontinyen pou son lavi nou pep. Mersi.

MR SPEAKER

Mersi. Onorab Bistoquet, mon ti'n ganny sinyale boner ki ou ti pou koze. Mon pa ankor war ou lev lanmen, lev lanmen silvouple si ou, *ok*. Mon a pas Onorab Johan Loze avan e apre ou.

HON JOHAN LOZE

Mersi Mr Speaker. Bonzour Mr Speaker. Bonzour tou bann Onorab Koleg e tou tou dimoun a lekout. Mr Speaker, pa zis Sesel me lemonn antye pe pas atraver en kriz sanniter, en kriz lasante piblik e sa ki nou'n ganny demande ozordi pou fer se pou met en zouti prezervasyon lavi, a laporte nou bann profesyonnel lasante piblik. Nou annan nou koman lezislater en moral pou nou fer sa ki bon e sa ki byen anver nou pep e anver la nasyon Seselwa. Nou napa en swa lo la.

Bomaten *Bills Committee* nou'n zwenn byen boner anba *chairmanship* Onorab Andre e nou'n fer bokou diskisyon. I annan konsern ki'n ganny leve. I annan lopinyon difere sorti lo tou lede kote, me sa ki nou'n agree lo la se ki in *lock step* tou lede kote latab nou pou donn nou bann profesyonnel lasante piblik sa ki zot bezwen pou travay e nou pou donn lanasyon Seselwaz en lespwar normalizasyon son lavi dan sa bann mwan e sa lannen ki ape vini.

Sa ki Sesel i bezwen an se moman se en, non selman laviktwar, me en siny laviktwar. I bezwen annan letensel lo lorizon ki enform nou pep e dir get ou pou byen demen, ou lekonomi pou rebran, ou lavi pou rebran. I annan bann *issues* konstitisyonnalite otour serten provizyon ladan ki'n deza ganny leve, mon pa pou retourn lo la.

E bomaten enn bann konsern ki nou, nou ti annan bomaten dan *Bills Committee* se ki petet nou ti devret annan ase letan pou nou fer en deba otour sa bann size. En deba pa pou okenn lot rezon apart pou edik e enform nou pep ki ti ava pe swiv nou *live* e *être* enformen lo sa size Konstitisyonnalite otour

sa provizyon legal ki nou pe pas ozordi.

In annan lot konsern, ki mon osi mon'n partaz konsern Onorab Pillay lo sa ki Minis in dir nou bomaten, konsern posibilite lentrodiksyon vaksen ki pa ankor fini ganny aprouve. Selman sa Minis i ava adrese letan i donn nou son repons.

Mr Speaker, Sesel la. I annan bann *issues* ase konpleks ki souvan nou vwar nou anbrouye ladan, akoz nou koman en Nasyon nou viv nou lavi en lavi ki senp e ki sen. Nou pa viv nou normalman lavi ki konplike, malsen e pou nou *over tax* nou lekor. Nou en nasyon senp e nou fer bann keksoz senp.

Me i annan bann konpleksite ki leve letan bann nouvo realite i leve. I annan en keksoz la an se moman ki nou vwar pe vini dousman, dousman, menm lo nivo fanmir, lo nivo kominote, lo nivo politik se *vaccine shaming*. Nou pe komans kestyonn sa enn, kestyonn sa lot si in pran, si i pou pran, si i pa pou pran. E nou pe perdi sa kote desizyon personnel e nou pe perdi sa kote imen, kot nou les dimoun pran en desizyon vizavi son lasante lo en baz personnel.

Isi anndan dan sa Lasanble i annan Manm lo tou

lede kote ki pa ankor pran vaksen. Mon pou dir zot fransman i annan Manm lo mon kote ki'n pran e bokou bann Manm lo mon kote ki'n pran zot in fer li avek gidans zot dokter. Zot in bezwen fer li dan sa fason pou rezon lasante personnel e mon asire i parey lo zot kote osi.

I annan Manm lo zot kote osi ki pa ankor pran. Mwan mon pou admet mon pa ankor pran akoz mon annan serten *underlying health issues* ki mon bezwen met anba kontrol. Be nou pa kapab devlop en kiltir dan nou pei kot dimoun pou bezwen vin devan e forse vin devan e eksplik sa bann keksoz.

Lasante en dimoun i en keksoz personnel pou li e i pa bann keksoz ki nou sipoze forse pou ganny defann. E sa i en valer ki nou bezwen regarde e nou bezwen les dimoun sa laliberte pou zot deside.

Sa ki nou bezwen fer se *statistically attain herd immunity* e non pa *bribery* lendividi. Sa i pou bezwen kler pou nou. Nou annan nou en *goal*, nou annan nou en bi e nou bezwen annan en sel mesaz lo sa size, se ki nou bezwen *aim towards attain herd immunity* dan sa pei.

So, mon oule reasir Minis ki nou lo sa kote nou pe al donn

zot sa zouti ki zot bezwen pou travay avek. Nou pe poz li dan zot lanmen e nou pe fer zot tou konfyans ki zot pou servi li byen e tre byen menm, parski ziska prezan nou vwar zot pe *operate* dan en fason ki bon e ki byen.

Selman kot zot bezwen led, lasistans silvouple pa ezite pou demande. Depi ki sa vaksen *Oxford AstraZeneca* in antre dan pei i annan serten fay dan lafason ki zot pe fer keksoz. Klerman zot mank resours dan sa kanpany vaksinasyon de mas ki zot pe fer. Silvouple balanse, aranze, regete.

Sak fwa mon desann sorti Bel Ombre dan bomaten i annan en nespes *chaos* la Beau Vallon kot vaksen pe donner. I pa byen pou lizye, i pa gou pou lizye, i pa gou pou gete e mon *wonder* sa bann dimoun la dan laliny ki mannyer zot santi zot.

Sa ki pe debout ek son bekir enn lo lot lo ledo kanmarad. Vaksinasyon pe ganny fer dan en fason ki pe al kont tou konsiny ki'n ganny met an plas, par Komisyoner Lasante Piblik li menm. Sa i pa en kritik, pa en kritik negativ. I en lobzervasyon ki mon trouve tou le bomaten letan mon pase, ki mon pe zis met devan a zot laporte pou zot silvouple fer en keksoz. Nou pa kapab kontinyen koumsa.

So, si zot bezwen led, si zot bezwen resours. Mon rapel letan Lalwa *Public Health Act* ti pase, Komiser Lasante Piblik i annan pouvwar li, pou li preakizisyon *basically* nenport ki resours ki i bezwen. Si ou bezwen zonnm rode! Si ou bezwen plas pran. Fer sa ki byen ek sa ki bon pou sa program vaksinasyon deroul byen silvouple !

Nou pa kapab zis get statistik dir nou dezyenm o monn, selman lafason ki nou pe vin dezyenm o monn, pe nwir nou dimoun, pe nwir lapopilasyon. Nou bezwen premye o monn dan lafason ki nou pe aport sa servis a nou pep.

Again sa pe kritik politik sa. I pa en kritik politik silvouple e i pa en kritik negativ. Mon pe zis ankouraz zot pou fer li pli byen. Mon konnen zot fatigue, mon konnen zot epwize e mon konnen zot pe donn tou deza. So, silvouple si zot bezwen led, zot bezwen lasistans, zot bezwen resours, rode kot zot kapab gannyen, pou zot fer sa travay dan lafason ki mon konfyans, mon konfidan zot kapab fer. Mon konnen zot kapab fer li pli byen. Selman zis la sityasyon ki depase.

E Sesel pe fer sa bokou pli byen ki larestan lemonn. I annan pei ki annan resours, mon pe koz resours. I annan pei ki deborde ek resours, pa kapab fer en kar sa ki Dokter Gedeon ek Dokter Louange in fer ziska aprezan dan nou pti pei Sesel. Ki vedir *over the past 44 years*, nou'n *train* dimoun, nou'n donn kapasite e nou'n donn zot liberte pou profesyonnalizm zot lekor e travay. Nou'n kree sa klima pou nou annan sa bann bon profesyonnel, aprezan *do the best you can*. Mersi Mr Speaker.

MR SPEAKER

Mersi Onorab. Onorab Rosie Bistoquet.

HON ROSIE BISTOQUET

Mersi Mr Speaker. Bonzour Mr Speaker, bonzour tou Onorab. Bonzour Minis avek ou delegasyon. Mon osi mon pou donn mon sipor total pou sa bann amannman ki pe anmenn devan nou. Akoz mwan koman en dimoun ki'n travay dan lasante koman en ners e an plis ki sa mon'n travay dan *Public Health Services* e sa lasante i pres avek mon lekor. E alors mon santi ki sa desizyon i en bon desizyon, sirtou dan sa kriz ki nou ete konmela, ki zot in

anmenn sa regilasyon pou kapab fer si ki nou konbat *COVID-19*.

E sa osi i fer mwan mazine sa regilasyon petet ti devret fer depi avan, akoz nou'n *entertain* ouswa nou'n pas dan diferan kriz. I fer mwan mazin par egzantp SARS, ki ti an 2000, 2002, 2004. I fer mwan mazin *H1n1* ki osi bann lepidemi preski parey avek *COVID*. Me selman de touttwa, sa sitasyon in ariv la devan nou e mon kontan ki Minister Lasante in nobou travay lo sa regilasyon pou kapab kontrol sa maladi.

Lo kote vaksen, mon bann koleg in dir ase sifizaman lo la, me selman mon ti a kontan demann par egzantp Dokter Gedeon, i annan bann dimoun ki pa pe kapab pran, malgre ki annan zot bann kondisyon, par egzantp bann *chronic cases*.

E osi i annan bann ki par egzantp ki annan bann ban *neurological conditions*. Parey *Gillian-Barre syndrome* ki mon konnen totalman zot pa pou kapab pran.

Eski si par egzantp nou deside pou donn en *passport* ouswa en sertifika, ki pou arive ek sa bann dimoun, eski zot osi zot pou kapab ganny *entertain*?

Apart ki sa lo sa, i annan bann aktivite ki mon krwar, ki'n mon'n ganny *call* par bann

piblik, bann piblik ki'n *call* mwan, pou mwan demann zot sa kestyon. Par egzanp bann aktivite sirout kot i konsern loperasyon e bann letablisman avek bann *trade and premises*.

I annan en ban ladan ki bann dimoun pe demande, nou konnen zanfan pe al lekol byento, nou pe demann dimoun pou travay dan lakour e zot pou bezwen zouti. I annan par egzanp letablisman ki vann bann *stationeries*, ki vann lank, par egzanp ki ou kapab met dan bann *toners*, bann keksoz koumsa. E sa bann letablisman i fermen total, zot pa'n ganny konsidere anba sa bann *premises* pou kapab ouver. E mon pe demande petet Dokter Gedeon si pep sa osi zot kapab regard ladan.

An plis ki sa, sa ki mon pou dir, regilasyon i bon. Mon konnen nou'n anmenn en regilasyon devan pou nou kapab fre sir ki nou kontrol sityasyon. Me selman sa ki mon santi petet Minis, atraver ou, Mr Speaker, nou demann en pe plis kontrol, en pe plis kontrol sirtou lo kot i konsern *monitoring*. Si i annan regilasyon, ou bezwen *monitor* si i pe marse, si i pa pe marse, apre fer en bon evalyasyon e fer dimoun konnen, piblik konnen ki zistans nou ete osi.

An plis ki sa, mon santi poudir parey mon bann koleg in dir, i annan en bon pe lenformasyon ki piblik i manke. I pa zis lo vaksen, me selman i konsern lezot sityasyon ouswa bann aktivite ki pe deroule ouswa bann lenformasyon konkret.

Par egzanp mon pou dir manm piblik pe demande ki lo sityasyon *COVID* parey Onorab Henri in dir, mon pti pe propoze ki nou fer en pti pe plis kontrol kot i konsern *contact tracing*. E petet annan bann zouti, met an plas ki kapab donn nou bann real time *deta* ki nou kapab konnen, demografikman kote nou ete, kote nou pe ale e kote nou kapab aranze.

E an plis ki sa ranforsi sa *Health Promotion Unit* dan Minister Lasante akoz i demann en pti pe plis ranforsisman kot bann lenformasyon i ganny pase a tou moman e sirtou lenformasyon i *timely*. E an plis ki sa ledikasyon e annou edik nou pep. Akoz malgre nou pou met regilasyon si zot pa ganny enformen, si zot pa ganny edike pou zot kapab pran zot responsabilite sa regilasyon i pa pou marse.

E annou kominik avek nou pep. I annan en kantite fason ki nou kapab kominik avek zot. Parey konmela, mon

konpran lo radyo pe pas bann lenformasyon pou vaksinyasyon, me selman servi bann lezot medya osi. Nou annan bann telefonn, bann *telephone line* ki zot kapab anvoy lo la, bann pti mesaz. Sirtou kote ki pe donn vaksen. Akoz i annan dimoun ki pe ale vini, i pa pe konmsi realize poudir i pa kapab mars ek en radyo. I annan en telefonn, tou dimoun i annan en mobile, alors servi sa bann zouti ki *available*, ou pa bezwen al *reinvent the wheel again*, pou kapab kominik avek piblik.

E sa apart ki sa mon pou donn sipor total sa lamannman ki pe vin devan, nou akoz mon santi i enportan. I pa zis pou la, me selman pou bann lezot lepidemi ki nou pou bezwen met anba kontrol. Mersi bokou Mr Speaker.

MR SPEAKER

Mersi Onorab. Mon pou pran sa de Onorab ki'n lev lanmen, me selman mon pou demann zot fer li bref, akoz mon ti a kontan donn Minis son *Right of Reply* avan nou pran *break*. E avek sa mon ava apel Onorab Waven William.

HON WAVEN WILLIAM

Mersi Mr Speaker. Bonzour Minis avek ou lekip, bonzour tou dimoun ki a lekout. Mr

Speaker, mon pa kapab rat sa sans pou koste e pou donn sipor sa Prozedlwa, ki a mon avi i vremen enportan pou nou kapab protez nou pep e koman en reprezantan distrik mon krwar i enportan ki mon donn sa sipor.

Mr Speaker, anmezir ki mon pe dir sa e la mon konnen poudir i pou annan en lot dezyenm *round* vaksen, mon anvi propoze avek Minis ek son lekip ki zot konsider sa bann pwen swivan. Akoz menm ki nou'n isi dan sa Lasanble, letan nou bann zabitan pe al pran zot vaksen i annan bann plizyer konsern ki nou, nou pa laba, me zot, zot eksperyanse e mon krwar i enportan ki lotorite i tenir kont sa bann konsern.

Par egzanp mon ti ava demann Minis pou sey konsider, mon konnen poudir zot napa ase resours e i annan bokou Seselwa la deor ki anvi ede. Petet i napa larzan, me selman i santi poudir avek son ledikasyon, avek son formasyon ki in gannyen i kapab donn en koudmen. Me ki mannyer sa bann dimoun o nivo kominoter zot kapab vin devan pou zot donn en koudmen.

Mon anvi ki zot konsider sa sizesyon, nou annan en nou en lalis voter Minis. I pa vedir la be nou pe al fer politik avek.

Me tou sa bann dimoun, mon pa konnen si zot pe anmas lenformasyon, par egzanz nimerò telefòn, ouswa ki rezyon i reste. Akoz la ki pe arive la, i annan dimoun pe vin kot stasyon pou pran vaksen, i vin 5 fwa, me laliny i plen. Prezan sa dimoun osi i annan en plan li, me si par egzanz annan en landrwa kot nou ti kapab annan serten bann dimoun ki ti kapab telefonnen, akoz nou konnen apepre konbyen letan ki bann ki bann dimoun pou ale, pou pran zot vaksen, pete pou gete si zot pa ganny bann sentonm.

Me annou sey dan dezyenm *round* sey re organize, akoz letan i annan eleksyon Komisyoner Eleksyon i annan en lekip li, mon pa konnen si zot kapab regard sa osi akoz mon'n tann Prezidan dir poudir nou kapab servi serten dimoun, dan bann landrwa servis esansyel. Petet sey mazin lo la zis pou tir en pti pe sa bann retar.

Epi dezyenmman letan nou pe koz bann *housing estate*, la ankor mon santi poudir i annan *PMC* avek *housing*. I annan serten bann *housing estate* zot in *set up* bann, nou apel sa en bann lekip *task force*. Be Minis ou a dakor avek mwan, dan *housing estate* mwan mon konnen poudir

mouvman tasyon pa kapab kontrole. Me selman lo en baz lentelizans lenformasyon nou kapab kree serten kontak, kot nou kapab minimiz petet sa propagasyon, akoz i amann serten bann dimoun i vreman negligans si ou pa la deryer zot.

An menm tan ou ti ava lans en lapel avek serten bann dimoun dan tou distrik. I annan bann dimoun ki en pti pe eran dan semen ou pa konnen ki bor zot ale dan lazournen, me selman zot pe al devan laport dimoun e nou pal konnen si zot annan sa.

E an menm tan mon pou siport sa propozisyon ki Onorab Gervais in met devan. Minis mon krwar poudir zot kapab, si zot trouv le neserer, bann dimoun pou ede. Pou donn lenformasyon par zour, par distrik. Akoz pou mwan sa i tre enportan, akoz nou menm nou koman Manm Parlman ler nou konnen, nou pa pe de mwan non nou, me selman letan nou konnen nou kapab pas sa bann lenformasyon ek nou bann dimoun, akoz nou bann dimoun i annan en serten respe osi pou nou. So, nou anvi donn koudmen e mon ava demande ki zot kapab sey mazin lo sa bann pwèn ki mon pe met devan, an menm tan ki

manner, akoz sa *policing* pou mwan i enportan. Parey Onorab Bistoquet in dir, *policing* i vremen enportan pou kapab kontrol propagasyon sa viris.

So, avek sa de pti pwen Mr Speaker, mon pou donn mon sipor total. Mersi.

MR SPEAKER

Mersi. Onorab Wavel Woodcock.

HON WAVEL WOODCOCK

Mersi Mr Speaker. Bonzour Minis, ou lekip, tou Manm e tou dimoun a lekout.

Mr Speaker, koman en Lasanble responsab nou konpran nesesite ki i bezwen annan bann mezir, bann Lalwa, bann Regilasyon an plas pou nou konbat sa pandemik *COVID 2019*. Deza i annan enn de bann mezir ki'n komans ganny pran, bann regilasyon an plas pou fer sir ki dimoun i gard social *distancing*, ki Seselwa, piblik, manm piblik i met zot *mask*. E la zisteman nou pe entansifye bann Lalwa, bann regilasyon ki an plas ki vedir ki bann dimoun i merit reste *within zot family bubble* e lezot Lalwa anfors. E nou santi le rezon det akoz ki nou pe vwar sa Lawal, sa lamannman dan sa

Public Health Bill in vin devan nou ozordi.

Me an menm tan i annan serten krentif deor, serten lafreyer deor. Par lefe si nou pe ekout leko deor, i annan en kous popilasyon ki annan serten rezervasyon kot i konsern sa programm vaksinasyon. Mwan mon *ok* avek sa, mon'n pran mon pikir e mon pe ankouraz tou dimoun *as far as much as possible* pou pran sa vaksen.

Me selman an menm tan, i annan nou koman bann Manm Elekte i enportan pou nou met konsern tou nou sitwayen devan. I annan en prensip fondamantal dan Lalwa, *the right to bodily integrity*, ki vedir ki ou pa kapab fors en dimoun pran en tretman medikal san son konsantman.

I annan bokou dimoun ki'n pran kontak avek mwan. Annefe menm yer swar i annan en zenn fir ki'n call mwan. I dir mwan i pe fer fas avek en defi, i annan en serten problemm medikal ki i annan serten rezervasyon lo pran sa vaksen. Me kot in *apply* e pa zis li, e i annan lezot senn osi ki pe fas avek sa, kot zot pe *apply* pou ganny louvraz, zot pe ganny dir ki fodre zot montre en sertifika vaksinasyon. Ouswa zot pe

ganny dir ki fodre zot in pran vaksen.

Mon kestyon, eski sa i pa pe vin en *form of* diskriminasyon, eski i en keksoz ki legal? *Ok*, mon en pti pe dakor ek sa i Onorab *Leader* Lopozisyon in dir, kot i konsern Seksyon 26(1) (b) (f). Kot sa lamannman ki zot pe anmennen pe dir ki, "*The requirements of vaccination as preventive measures to combat, control, treat and prevent the spread of infectious diseases and authorising the use of such vaccines in emergency situation.*". I annan bann ki ler zot in get sa i annan en serten lafreyer ki sa i en *precursor*, i pe *set the tone* pou ki nou pou vwar dan lefitir ki Gouvernman pou le anmenn bann mezir pou fer ki pran vaksinasyon i vin obligatwar. E *the requirement of vaccination as preventive measures.*

Kekfwa lafason ki zot ti merit drafte sa se, akoz *there are more than one*, petet *possible preventive measures* ki kapab ganny pran olye dir *as preventive measures, maybe as 'a' preventive measures.* Kekfwa i pou annan bann lezot fason prevansyon ki kapab ganny itilize pou anpes pou tretman *COVID*, ouswa pou anpes sa viris propaze.

Alors i bann konsern ki la deor ki kekfwa Minis i bezwen adrese pou reasir bann dimoun deor ki nou pa pou vwar en sityasyon kot en lenpozisyon pe ganny mete lo enn de dimoun, ki demen kekfwa nou kapab vwar en serten fristrasyon parmi nou pep, ouswa en serten protestasyon.

Avek sa de mo, Mr Speaker, mon dir ou mersi.

MR SPEAKER

Mon a dir ou mersi Onorab. Nou en pti pe zis lo letan, mon pa ti pou kontan pres Minis pou fer son *Right of Reply* e an menm tan mon anvi gard lo ler ki nou'n donn *SBC*. Alors mon a prefere nou pran nou *break* la e nou a re pran ller. Mersi.

(BREAK)

MR SPEAKER

Mon ava apel Minis pou donn son larepons, silvouple Minis Vidot.

MINISTER PEGGY VIDOT

Mersi Mr Speaker. Pou komanse mon ti a kontan vremen dir mersi pour tou bann Manm ki'n fer entervansyon lo sa lamannman ki nou pe propoze, e ki nou'n ekout byen tou zot bann sizesyon e nou'n byen note.

Mon'n ganny demande pou mwan adres enn de konsern ki zot annan dan sa amannman. Prensipalman mon a komans avek sa enn premye ki'n paret in nonm en pe pli souvan, sa kestyon lo konstitisyonalite. Si nou vaksen pou mandatwar?

Parey tou vaksen dan Sesel, nou pa panse ki sa vaksen ki pe ganny donnen pou COVID-19 ki i pou mandatwar. Nou ti a kontan kantmenm ankouraz tou dimoun pou pran sa vaksen, akoz nou konnen ler nou ariv en nivo poursantaz dimoun ki'n ganny iminite par en vaksen, i anmenn en gran proteksyon pou pei parey ki nou apel *herd immunity*.

Alor nou ti a kontan toultan e menm demann zot, zot led parey en bann zot in dir zot pe fer. Kontinyen ankouraz tou dimoun pou zot pran vaksen koumsa nou ava ariv la bokou pli vit.

Sa ki sa amannman pe fer, pe vremen vini pou nou demann, pou met sa vaksinyasyon e koman enn bann diferan mezir ki nou'n pran pou nou konbat COVID-19 dan en kad legal.

Nou pa pe dir poudir i pou mandatwar. Parey nenport ki regilasyon, si i annan okenn sanzman avek i bezwen vin

devan Lasanble ki Lasanble i annan en lot koudey lo la e ki zot pran en desizyon baze lo sa ki zot panse koman lezislater i merit pran. Me pour lemoman la napa okenn Polisi Gouvernman pou fer vaksen mandatwar.

Nou'n ganny demande eski i kapab annan en posibilite ki serten dimoun i demande ki sa i vin en, or serten group ki si ou, si ou aletranze i ganny demande koman en pre kondisyon pou zot pran en dimoun dan zot letablisman?

Lo sa size i en size ki pou vremen demann en bon pe deba. Me sa ki mon ti kontan dir toudswit se ki lo group enternasyonalman, lo group par egzanp *airlines*, nou pou napa okenn dirediskyon pou nou dir zot pa fer ou si non, fer.

Nou konnen an se moman ki en kantite keksoz par egzanp pou *hepatitis*, etidyan pa pe kapab antre dan liniversite si zot pa'n ganny sa vaksen. I tre probab ki sanmenm sa ki nou pou vwar osi avek COVID.

Nou konnen en kantite pei, taler Onorab Georges in dir nou ek son pti *passport zonn*, ki si i ti napa i annan de pei pa pe donn ou larantre. I posibil ki nou pou vwar osi menm soz avek COVID-19, me sa i pou deor nou kontrol.

Alor pour lemoman nou pa pe vwar ki vaksen i mandatwar. E si par egzanp i annan dimoun ki demande, ki sa dimoun ki pe vin kot li dan son letablisman i annan, i bezwen pran vaksen, ankor i pou sa dimoun ki pe demande.

Mon krwar nou tou nou realize poudir nou drwa pou lavi i kekfwa sa drwa ki pli enportan pou nou tou. Alors sa i vin en pe lo nou dwa pou lasante. E si sa dimoun li i pe mazine i anvi prezerv son lasante, i pa oule ki par egzanp ou antre avek serten keksoz dan son lakour. Sa se sa dimoun.

Nou tou nou annan dwa, me nou tou nou annan serten responsabilite anver nou menm, anver nou lekor, anver lezot keksoz. Alors pou sa repons, vaksen i pa pou mandatwar.

Sa *fixed penalty* ki nou'n ganny dir. Eski sa i pou en sonm ki rezonnab. Ankor parey tou regilasyon i pou vin kot zot, me nou panse ki koman en Minister nou pou egzers responsabilite parey nou pe fer dan tou keksoz, dan tou desizyon, dan tou Polisi ki nou sorti avek. E nou pa pe mazine poudir sa *fine* i pou en keksoz ki pa pou rezonnab. I annan diskisyon ki'n ganny

pran oparavan e kekfwa sonm ki pe ganny desid lo la se R500 a R2mil i pou depan lo lofans.

Me nou bezwen realize poudir si i annan en *fixed fine*, i bezwen kantmenm lo en nivo ki pou fer li vin en *deterrent* pou anpes dimoun kas sa Lalwa. En lot keksoz ki'n ganny demande, eski vaksen pou sel mezir ki nou pe pran dan sa konba kot *COVID*. I pou enn selman e pour sa rezon ki nou'n bezwen vin isi e koman vaksen i enn bann mezir kekfwa ki'n ganny entrodwi en pe pli tar, alor i rezon pou *la quelle* nou la ozordi bomaten pou demande ki nou amann sa Lalwa Lasante Piblik, pou nou permet servi sa vaksen dan sa sikonstans ki nou vwar nou bezwen pe servi li.

Tel ki par egzanp mon'n mansyonnen, si in fini pas tou son staz laprouvasyon parey lezot vaksen in fer dan lepase. E pou nou, nou'n fer tou nou *due diligence*, pou espere ki en vaksen avan ler i ganny entrodwi isi, in ganny rekonnèt par bann regilater kredi, b a diferan nivo e avan nou'n entrodwi li dan pei.

E pour sa rezon kekfwa ki menm si vaksen ti'n ariv depi en pti pe avan lafen Desanm, nou'n espere ziska nou'n ganny son laprouvasyon e nou'n

ganny tou bann dosye enportan, nesese pou nou kapab komans servi li le 10 Zanvye.

Zot in osi ed nou avek en kantite keksoz ki zot ti a propoze ki nou fer pou nou amelyor nou kanpany vaksen. E pour sa nou dir zot mersi. Nou'n note en kantite, nou realize poudir i annan en kantite defi e nou pe fer nou mye e avek zot led, zot sizesyon nou ava pran sa, nou ava regarde ki mannyer nou kapab amelyor sa program. Alor mersi bokou pou tou sa.

Nou realize poudir i annan en *cluster* kot *IOT*. Sa in ganny souleve. Mon asir zot poudir ki Komisyoner Lasante avek son tim pe fer tou keksoz nesese. I travay tre pre avek *Management IOT* pou pran tou aksyon ki nesese pou si oule aret sa devlopman *spread* sa maladi laba e kontrol li, met li anba kontrol e an menm tan prenon kont ki mannyer i kapab gard sa lendistri kontinyen travay.

So lo sa pwen nou rasir zot poudir nou pe fer nou mye. Nou'n ganny demande pou entansifye nou ledikasyon ek lenformasyon ki nou met deor avek piblik, sa nou pe fer. An anmezir nou ale nou realize, nou vwar bann defayans e nou kontinyelman amelyore.

Nou krwar sa propozisyon ki nou fer nou *update* si oule par distrik i posib i ava en pti pe touse pou nou fer sa lo en baz toulezour, me nou kapab asir zot ki la le moman nou pou kapab komans fer li tou le semenn.

E alors pou sa mon kwar mon'n kouver Mr Speaker, la mazorite pwen ki en konsern e ankor mon a dir mersi tou bann Onorab pou zot lasistans, led avek bann sizesyon koman nou kapab fer nou kanpany e nou *repons to COVID-19* pli bon. Mersi.

MR SPEAKER

Mersi Minis. Mon rekonnèt ki bomaten nou deba in al bokou pli larz ki zis sa *Bill* ki ti devan nou. Me selman sa i en size avek telman lentere piblik ki mon kwa in vremen itil pou nou bann Manm ganny sans eksprim diferan konsern e met diferan sizesyon devan.

Alors mon remersye Minis ki'n pran note sa bann konsern e ki in apresye bann pwennvi e sizesyon. Mersi bokou.

Prezan nou a konsider Staz Komite. Wi, nou bezwen al lo *formal Second Reading of the Bill*. Alor premye avan sa nou bezwen pran en vot lo *the General Merit of the Bill*. Alors annou pran sa vot. Ban ki

aprouv sa *Bill* pou *General Merit*, tou bann ki an faver lev lanmenm silvouple? Tou bann ki kont.

Formal Second reading of the Public Health Bill in ganny aprouve. 31 Manm in vot pour, 2 Manm in *abstain*. Alor nou pas lo *Formal Second Reading* e mon a demann Clerk pou fer sa.

MADAM CLERK

Mersi Mr Speaker, *A Bill of an Act to amend the Public Health Act, 2015 (Act 13 of 2015)*. Mersi Mr Speaker.

MR SPEAKER

Mersi Madanm Clerk. Prezan nou a konsider *Committee Stage*. Mon konpran nou bezwen en vot si nou pa pou al dan *Committee Stage*, me nou pa bezwen en vot si nou pou al dan *Committee Stage*. Alors eski i annan okenn Manm ki pou demann lamannman lo sa *Bill*. *Ok*, alor mon a demann Serzan pou nou pas dan *Committee Stage*.

MR SPEAKER

Mon bezwen prezant leskiz Madanm Clerk in dir mwan i pa'n kapab aranz fasilite *micro* pou la pou sa sesyon. Alors sa ki nou pou fer se si i annan bann Manm dan milye lasal ki konnen poudir zot pe al propoz

amannman dan Komite, mon ti a demann zot, zot kapab pase al par deryer pou zot fer zot entervansyon ler zot pare.

Leader Lopoziyon ou ti oule. *Ok*, wi alor mon a komans avek Onorab Georges.

HON BERNARD GEORGES

Mersi Mr Chairman. Mr Chairman, nou pa pou long. Premyerman mon anvi prezant en leskiz akoz bann lamannman ki mon pe al propoze, se bann lamannman tipografi. Napa lamannman sibstansyel akoz tou dimoun i an faver, *at least up to now* ki mon konnen *Bill* ki manner i ete.

Sa bann lamannman ti devret pe pas atraver *Bills Committee*, me malerezman etandonnen ki *Bills Committee* in zwenn bomaten, mwan mon ti annan en lot keksoz pou fer alor avek ou permisyon mwan mon ava propoz sa bann lamannman e non pa pas li atraver *Bills Committee*.

Nou pa'n ganny letan pou nou *fine tune*. Me avan mon al laba Mr Chair, avek ou permisyon mon ti a kontan dir de keksoz ki mon'n manke dir taler, e ki mon krwar i enportan pour popilasyon zeneral e sirtou nou menm nou dan sa Lasanble konsyan. Nou'n koz lo

konstitiysonalite sa bann mezir e mon ti anvi zis aport a latansyon Manm Lasanble piblik 2 provizyon nou Konstitisyon ki relevan dan sa Lalwa ki nou pe apse.

Premyerman se Lartik 29 nou Konstitisyon, *'the right to health care'* ki en, parey nou konnen i en *second generation right*, kot Leta i angaz li pou fer en serten keksoz. E enn se pour fer provizyon pou swen lasante. E lartik 29 nou Konstitisyon i dir ki Leta i rekonnèt drwa sak sitwayen pou ganny proteze e pou ganny en swen lasante ki kapab protez son lasante fizik ek son lasante mantal.

E pour efektifman egzers sa dwa, Leta i *undertake*, i pran. I ava fer le neseler pou enn bann keksoz *29 (1) (b) to take appropriate measures, to prevent, treat and control epidemic and other diseases*. Donk klerman konstitisyon i dir ki Leta i pran an gard, e *undertake* pou li pran okenn mezir neseler pou protez, tret e kontrol lepidemi. Donk en pandemik e okenn lezot *diseases*. Donk sa ki nou pe fer bomaten i antre kareman dan *framework* nou Konstitisyon.

Me I annan osi Lartik 25 ki koz lo *'freedom of movement'* e sa se sa enn ki *Leader*

Lopozisyon, enn de nou bann Manm, Onorab Woodcock e osi Minis in aborde bomaten.

E Lartik 25 i prevwar ki tou sitwayen Sesel ki lo teritwar Sesel, pou kapab marse anndan Sesel. Sorti Sesel al deor e re antre Sesel mannyer zot anvi san okenn lobstak. Sa se *the freedom of movement*. Me i pa en drwa absoli. I en dwa ki annan serten rezervasyon e donk serten derogasyon dan serten ka sa *freedom of movement* i kapab ganny restrikte.

E enn bann fason ki i kapab ganny restrikte, se anba en Lalwa, mon pe regard Lartik 25(3)(a), se anba en Lalwa neseler dan en sosyete demokratik, dan lentere *Public Health*. *Sorry, wi, public safety, public Or public health*. Donk ankor Konstitisyon i donn, i permet ki en Lalwa i ganny pase par sa Lasanble parey nou pe fer bomaten ki kapab restrikte sa *freedom of movement*.

Donk mon ti anvi zis fer sa 2 pwen sorti sirtou pou bann nouvo Manm e sirtou pou ledikasyon e ledifikasyon lapopilasyon an zeneral, pou montre ki mannyer sa ki nou pe fer bomaten i antre dan son konteks Konstitisyonnel.

E avek sa detrw a mo Mr Chairman, mon ti ava kontan propoz avek *the panel* sa bann lamannman swivan dan zot Prozedlwa ki devan nou. Premye dan *Clause 2(a)* kot i komans par *in the chapeau*. Dan son dezyenm laliny “*infectious disease*” ti devret lir “*infectious diseases*” akoz anba son *Lalwa Public Health, that’s how it is*. I en *faute de phrase*, i en *typo*.

E dan *2(b) in paragraph (d), by deleting the word “or”* apre i annan en pti *(c)*. Mon krwar sa osi se en *typo*. I pa devret la li. Alor i devret dir *by deleting the word “or”*; Apre mon ti ava azoute zis pou fer li kler, e sa zot ava vwar li zis an referans avek *the main Act* si zot pe regard *the main Act. by deleting the word “or”*; In *paragraph (e) ‘by replacing the full stop at the end by a semicolon’* epi i kontinyen.

Akoz sa ki nou pe fer, nou pe azout en nouvo paragraf *(f)* e *(e)* konmela i fini avek en *full stop*. Fodre nou tir sa *full stop* nou ranplas li pare en *semicolon* epi nou a fer antre *(f)* manner i ete la.

E dan *(f)* mon pe propoz avek panel ki sa dernyen mo, “*the use of such vaccines in emergency situation*”, mon ti a prefere vwar li *au pluriel*. In

“*emergency situations*.” I ava lir pli byen, i ava donn en pli larz son aksyon avek Minis.

Donk sa se bann propozisyon pou *Clause 2*. Dan *Clause 3* bann amannman *to section 64*, la i plito en kestyon langaz *rather than typo*. E mon ti ava propoze dan *Clause 3 (na)* “*the creation of offences and imposition of penalties not exceeding a fine of SCR50,000 or imprisonment*.” Pa bezwen ‘an’. “*Or imprisonment for a period not exceeding 2 years*.”

E dan *(nb)* en pti pe pli konplike, mon ti ava swete ki i lir “*the imposition of a fixed penalty in respect of any offence*,” pa bezwen “*such*.” (*comma*) “*and authorize one or more public officers for such purpose*.” Selon mwan i lir pli byen.

E dan *(nc)*, mon ti ava swete propoz bann modifikasyon swivan. Olye *specify*, ankor enn fwa fodre nou lir sa dan konteks son *chapeau* avek Seksyon 64 dan son *principle Act*. Mon ti ava propoz “*specifying*” *rather than “specify”*, “*that the payment of a fixed penalty may discharge the person of*”. Mon ti ava delete ‘*the*’. *Of liability from*, mon ti ava delete *the other ‘the’* osi *prosecution for*, mon ti ava sanz *such* pou fer li vin ‘an’. So

that it reads “specifying that the payment of a fixed penalty may discharge the person of liability from prosecution for an offence.” Akoz ‘an’ instead of ‘such’, akoz i stand along (nc). ‘Such’ i byen dan (nd) akoz i pe refer avek sa lofans dan sa menm paragraf. Me dan (nc) ‘such’ pa fer referans avek okenn lezot lofans alors mon pe propoz ‘an’.

That’s it Mr Chair. Mon ti a fer sa bann propozisyon pou fer sa Lalwa lir selon mwan en meyer fason. Mersi bokou.

MR SPEAKER

Mersi Onorab. Eski panel i ava adres sa bann propozisyon. *Attorney General.*

THE ATTORNEY GENERAL **MR FRANK ALLY**

Mersi Mr Chairman, bonzour tou dimoun. Mon krwar nou napa okenn obzeksyon avek sa bann propozisyon fer par Onorab *Leader* Lopozisyon. Me selman mon pa konnen si dan, *sorry Leader Government Business.* Mon pa, petet *Leader*, Onorab Georges i kapab konsider apre *2 years* dan (na) anba 3. *Clause 3 (na) or both?* Mersi.

MR SPEAKER

Mersi. Onorab Pillay.

HON SEBASTIEN PILLAY

Mersi Mr Speaker. Mr Speaker, i paret i ti pe mazin mwan. *Ok*, mwan mon annan en konsern vizavi sa *main Act* akoz ler mon regard sa lamannman ki nou pe anmennen, Nou pe anmenn li pou nou kontrol *basically sort of deal* avek sa lenfeksyon oubyen sa *spread*, ler in ariv dan kominote oubyen i *on the ground* petet si mon kapab servi sa term.

Me ler nou regard *26(1)* anler dan son *chapeau* i pe koz lo *introduction of sa infectious disease* dan Sesel. Eski panel i pare pou konsidere *“the danger of introduction and spread of infectious diseases”*, apre nou amenn sa *into Seychelles?*

Akoz sa lamannman ki nou pe fer avek sa (f) ki nou pe azoute i plito *relate* avek, sa i dan pei e la ou pe propoz vaksinasyon *as a means* pou kontrol li.

Apre en lot pwen ki mon ti oule fer sorti, nou’n koz lo *IOT* e mon pa konnen si ti pou neserer dan 26 pou nou petet azout avek bann *Clause* ki nou annan pou dir *“the compelling of any organization or institutions to comply with the regulations of the Public Health Authority regarding the management of such epidemic within their organization.”*

Akoz ki mon santi, poudir parfwa sityasyon in ariv koumsa akoz in annan serten *lapses* lo komansman, ki pa ti neserman bezwen e apre lentervansyon *Public Health Authority* e *Public Health* pe sey fer son mye pou *manage* sa sityasyon.

So, mon pa konnen si panel i kapab konsider e oubyen Dokter Gedeon i kapab dir mwan kote ki zot *capture* ler en lenstisyon oubyen en lorganizasyon, i kapab en lizin, *whatever*, pa pe *comply* oubyen pa pe swiv bann regilasyon. Ki mannyer ou kapab *capture* sa? Akoz sa ki mwan mon enkyet, se ki *IOT* pa kapab aret prodwi. Nou pa kapab aret son prodiksyon.

So, sa ki pe *manage* sityasyon i bezwen fer sir poudir i pe swiv tou bann konsiny pour ki *IOT* i kontinyen annan prodiksyon. So petet ... Apre mon dernyen propozisyon Mr Speaker, ler mon get sa lamannman nou rekomande "*the requirement of vaccination as preventive measures.*"

Mon pe mazinen si Minis pa ava petet vwar, konsidere "*the requirements of vaccination as part of preventive measures to combat, control and treat.*" Konmsi i donn ou sa *part of* i ava annan lezot *preventive*

measures ki ou bezwen met an plas pou *deal* ek sa sityasyon.

Mon pa konnen si *panel* in konpran mwan e si zot kapab klarifye sa detrwa pwen pou mwan. Mersi Mr Speaker.

MR SPEAKER

Mersi. *Attorney Zeneral.*

THE ATTORNEY GENERAL **MR FRANK ALLY**

Mersi Mr Chairman. Mr Chairman lo size premye pwen leve par Onorab *Leader* Lopozisyon, mon krwar ki ler i annan okenn *guidelines* oubyen okenn lord ki bezwen ganny fer *were the specific* li i pou target en serten lorganizasyon, antite oubyen aktivite, sa *Public Health Commissioner* anba *Infarction Diseases Regulation*, i kapab fer en lord e la sa lord si i pa ganny swiv, *then* sa dimoun pou komet en lofans. Annou pa bliy bann lord ki *Public Health Commissioner* i kapab fer. E i ase ekstansiv e ladan parey ou pou vwar dan son bann lord i menm dir poudir tou bann dimoun ki pe fer bann aktivite zot bezwen *ensure* ki i annan social *distancing*, i annan *hygiene*, *hand hygiene* eksetera, eksetera. So *that* i annan sa bann fasilite *available*.

Petet i pa pou neserer pou nou met dan sa Prozedlwa, akoz i deza kapab ganny fer anba *Public Health Act* e bann regilasyon ki *Public Health Act* in otoriz Minis Lasante pou fer.

Lo *size and spread*. Mon krwar *the word 'or'* la i ase. So, *that* si i annan en lentrodiksyon oubyen en *spread*. So, pou annan en *spread* i kapab annan en lentrodiksyon *from outside*, i kapab osi en *spread* ki *from* lanmenm eternalman. So, la en *'or'* i pou osi kapab *'and.'* So, mon pa krwar petet i neserer *unless* ki mazorite i santi pou fer li pli kler, me en *and* osi pou kapab *mean* en *or* la.

Lo sa trwazyenm propozisyon sa *'part of.'* Mon krwar sa propozisyon i ase eksansiv, i pou osi kapab *mean part*. *Because it says the requirement of vaccination as preventive measures* ouswa si zot le, si Lasanble an mazorite zot prefere, *then* i kapab vin *"the requirements of vaccination as a preventive measure to combat."* *"As a preventive measure"* dan plas *"as preventive measures."* Mersi.

MR SPEAKER

Mersi *Attorney General*. Onorab Pillay ou ti a kontan swiv.

HON SEBASTIEN PILLAY

Yes, Mr Speaker. Mr Speaker, mon konpran sa ki *Attorney Zeneral* pe dir mwan. Me ou konnen, ler nou get sa Lalwa sa bann regilasyon ki *Attorney Zeneral* pe koz lo la. Si i ti *as significant then* mon pa konnen konmsi. Pou mwan *IOT* ti devret pe *abide by it initially*. Mon pa pe dir ki i pa'n *abide*, me mon pe dir in annan serten lackin ki pa ti devret annan.

Mon konpran son pozisyon, so li i annan komann tou bann lenstriman legal ki manner zot asosye ansanm. Mon ti a kontan selman met lanfaz akoz si en landrwa pa pe *comply* i bezwen annan en *fine*, i bezwen annan en fason ki i ganny *deal* avek pou montre poudir i pa pe *comply* la, alors i annan en keksoz ki arive pou ki demen napa en lot ki repete.

An se ki konsern son largiman vizavi sa *control and spread* la, mon ti a kontan *alert Attorney Zeneral* ki si i lir tou larestan sa bann *Clause*, tousala i koz lo *entry into Seychelles, importation into Seychelles* e *vetenary examination* i konsern zannimo. Tousala i koz lo *entry into Seychelles*.

Mon pa vwar li pe koz lo *the spread into Seychelles*. Sa ki mon ti pe propoze se ki pou

nou fer li pli *neat* e fer li pli an ankor avek sa ki nou pe propoze, nou pe koz lo pa zis son *entry* me nou pe koz ler in ariv Sesel, so *spread* osi. Akoz nou'n fini kouver vaksinasyon pou en dimoun.

Son *chapeau* i dir "*the Minister may for the purpose of minimizing the danger of introduction of infectious diseases into Seychelles, prescribed by regulation.*"

Ok, alright.

MR SPEAKER

Ou *ok* avek sa. *Spread.....*, mon krwar i donn nou en serten kouvertir. *Ok.*

HON SEBASTIEN PILLAY

Mon krwar i donn nou en, en kouvertir, *ok.* Me selman mon ti a kontan Minis petet i kalifye sa bout *part off* konmsi. Mon pa ti a kontan ki nou pe vwar li *as the only measure.* E mon ti a kontan Minis konmsi i reasir nou vizavi bann mezir ki annan dan bann regilasyon, menm ou'n tande poudir par egzanp si i annan en lenstitisyon bann lotel par egzanp. Nou'n tann bann serten landrwa ki bann dimoun pe kot lo kot i annan *cluster* ankor, so ki mannyer konmsi, *at least* nou pe pran bann aksyon ek sa bann landrwa pou ki zot *comply* avek

sa ki pe pase. Mersi Mr Speaker.

MR SPEAKER

Attorney General ou ti a kontan re pas lo sa pwen *part of.*

THE ATTORNEY GENERAL MR FRANK ALLY

Mersi Mr Chairman. Mr Chairman, mon pa konnen si *Leader* Lopozisyon ti a satisfise avek *the requirement* e Lasanble osi. "*The requirements of vaccination as a preventive measure to combat ...*"

MR SPEAKER

Ok, ou aksepte sa Onorab Pillay. I bon, *ok.* Okenn lot amannman?

Tre byen, dan sa ka mon krwar nou pa bezwen pran okenn vot lo amannman, *Attorney General* in aksepte. E avek sa nou ava pas dan Lasanble.

MR SPEAKER

Onorab Georges, eski ou ti a vin devan avek Mosyon pou *Third Reading.*

HON BERNARD GEORGES

Mersi, Mr Speaker. Mr Speaker, si nou'n fer *Formal Second Reading* mon *move* anba *Order 76(1)* ki the *Public Health (Amendment) Bill, 2021* i

ganny lir pou en Trwazyenm Fwa. Mersi.

MR SPEAKER

Eski Mosyon i ganny segonde? Onorab Arissol.

HON SANDY ARISSOL

Mersi Mr Speaker. Bonzour ankor enn fwa. Mon ti a kontan segonn Mosyon anmennen par Onorab Georges. Mersi bokou Mr Speaker.

MR SPEAKER

Mersi, nou a pran vot lo Mosyon pou *Third Reading*. Tou Manm ki an faver lev lanmen silvouple. Mersi, bann ki kont.

Mosyon pou *Third Reading Public Health (Amendment), Bill* in pase avek 31 vot pour e 1 Manm ki'n *abstain*. Alors mon deklare ki *Public Health (Amendment)*. Pardon Madanm Clerk.

Wi, mersi nou a pas lo *Formal Third Reading* silvouple.

MADAM CLERK

Mersi Mr Speaker. *This Act may be cited as the Public Health (Amendment) Act, 2021*. Mersi Mr Speaker.

MR SPEAKER

Mersi Madanm Clerk, e mon deklare ki *Bill* in vin *Public Health (Amendment) Act*. Avek

sa mon ava remersye Minis ek son delegasyon pou zot prezans e zot partisipasyon e nou vremen ankouraze par lentere ki zot in montre avek bann propozisyon ki Lasanble in avanse.

Mon a dir zot mersi bokou e mon envit zot pou fer zot depar.

MINISTER VIDOT AND HER DELEGATION WAS EXCUSED FROM THE HOUSE

MR SPEAKER

Next item lo Order Paper i en Mosyon e sa i ganny prezante par Onorab *Leader Biznes Gouvernman*, Onorab Georges.

HON BERNARD GEORGES

Mersi Mr Speaker. Mr Speaker eskiz mon ti pe koz avek *Attorney Zeneral*, ou'n demann mon Mosyon?

MR SPEAKER

Wi.

HON BERNARD GEORGES

Mersi. Mersi Mr Speaker. Mr Speaker devan nou annan en Mosyon ki lir koumsa, *in accordance with Article 155 of the Constitution, the National Assembly resolves to authorise the withdrawal of R2,611,787,886.75 from the*

Consolidated Fund for the purpose of meeting expenditure necessary for the service of Government until 30 April 2021.

Mr Speaker, mon ava pran sa moman avek ou permisyon, *unless* ki ou anvi nou segonn Mosyon avan, me *unless* ki se sa ou direktiv, avek ou permisyon mon ava koz en pti pe lo Mosyon.

MR SPEAKER

Si ou panse ki enplikasyon avan nou segonde, i ava ede, silvouple *carry on*. Mersi.

HON BERNARD GEORGES

Mersi Mr Speaker. Mr Speaker mon ti a kontan pran enn de minit avek ou permisyon sirtou pou bann nouvo Manm Lasanble, me osi ankore enn fwa nou konsyan ki piblik pe swiv nou e sa bann keksoz ki nou pe fer la pa ariv souvan, pou fer en pti lesplikasyon, kisisa ki nou pe fer la bomaten, pou ki tou dimoun i konpran egzakteman sa ki pe arive dan tou latransparans.

Mr Speaker, enn bann pouvwar prensipal, en Lasanble Nasyonal e sirtou nou Lasanble Nasyonal, se pou otoriz Gouvènmman, depans larzan.

Gouvènmman i annan konman enn son fonksyon apard administre pei, konman

enn son fonksyon se anmas larzan. I fer sa parey nou konnen, atraver *tax*, atraver lavant propriyete Gouvènmman, atraver lenvestisman ki in fer e atraver okenn *rents* okenn lezot lazan ki gannyen *dividends*, avek bann parastatal, eksetera.

Tousala i al dan reveni Gouvènmman, e reveni Gouvènmman i ganny depoze dan en fon ki apel *the Consolidated Fund*. E se sa larzan ki en Gouvènmman en pei i servi lannen apre lannen pou li administre pei. Pey bann depans pey bann Minister, pey bann depans bann Lazans Gouvènmman eksetera, eksetera. Fer Proze Kapital eksetera.

Gouvènmman i en landrwa donk anmas larzan, me i napa drwa depans en sou dan sa larzan ki in anmase, a mwens ki i ganny Lotorite sa Lasanble. E sa i vin atraver *a whole oversight* ki Lasanble i fer lo Gouvènmman, pou anpes Gouvènmman depans larzan dan en fason i pa soutenab, oubyen ki pa dan lenter Nasyon an antye. E se nou konman reprezantan Lepep e direkteman oubyen proporsyonnelman ki annan sa tol *oversight* pou fer lo Gouvènmman.

E sa donk i anmenn en degre *accountability* e transparans dan sa ki Gouvernman i fer.

Sa lotorizasyon ki Lasanble i donn Gouvernman, i donn li pou lan *at a time*. I pa donn li en blennket pou li depans tou sa ki i anvi pandan 5an pandan tou son manda, me i bezwen retourn devan Lasanble Gouvernman enn fwa toulezan pou demann avek Lasanble otoriz en serten depans ki li i anvi pou sa lannen ki pe vini.

E sa i fer, parey nou konnen atraver en seri mezir. Premyerman Gouvernman i bezwen depoz *Estimates* devan Lasanble, e sa se *Estimates* ki larzan i pou al anmase dan sa lannen ki pe vini, e ki larzan i pe al depanse dan sa lannen ki pe vini. Avek plizyer lezot keksoz ki nou ava vin lo la dan detrwa minit.

Dezyenm keksoz ki i bezwen fer, se anvoy en *Bill* devan Lasanble pou Lasanble otoriz depans. E sa son mo i apel Lapropriyasyon, e nou fer sa atraver *Appropriation Bill* ki annan lalis tou bann *heads*, me pa detay tou bann *heads* ki Gouvernman pe depans pe demann Lasanble otoriz li pou depanse.

Annan defwa i arive ki akoz en Bidze dinamik, ki Gouvernman swa i depans an tro oubyen i vwar li dan sityasyon kot i bezwen al depans an tro, alor dan sa 2 ka i anmenn sa ki nou apel en *Supplementary Appropriation* devan Lasanble.

Mon'n dir ki depans Gouvernman i lo en sif anyel. E etandonnen ki nou lannen fiskal isi Sesel i konmans depi le 01 Zanvye i fini le 31 Desanm, sa legzersis demann permisyon Lasanble, pou depans larzan ki Gouvernman i bezwen fer, natirelman i bezwen ganny fer dan sa letan avan sa lannen kot larzan pe al depanse pou ganny fer.

E Konstitisyon i prevwar ki avan le 30 Zanvye dan okenn lannen kot sa depans pou al ganny fer, Gouvernman i bezwen vin devan Lasanble, e depoz *Estimates* devan sa Lasanble avan le 30 Zanvye dan sa lannen kot depans pou bezwen ganny fer.

Zeneralman e tradisyonnelman, sa i pa ganny fer avan le 30 Zanvye, i ganny fer an Novanm. E toulezan, popilasyon Sesel i abitye vwar ki Gouvernman i vin isi avek en *Appropriation Bill* e nou debat lo la. Minis i fer son propozisyon Bidze, nou debat lo la. E

Lasanble i otoriz Gouvernman pou depans en serten sonm larzan.

Me letan donn ki an Novanm sa lannen pou plito lannen pase, ti'n fek annan en eleksyon, ti'n fek annan en sanzman ladministrasyon dan pei, sa nouvo Minis pa ti kapab dan sa letan ki i ti annan, prepar en Bidze letan donner osi ki nou ti dan en lepok kriz i pa ti kapab prepar en Bidze e anmenn devan nou an Novanm ou an Desanm avan ki lannen ti fini.

Alor i pou fer sa la prezan dan sa peryod letan ki devan nou. Mon'n dir ki Konstitisyon i dir ki *Estimates* setadir *income* ek *expenditure* i bezwen ganny depoz devan nou avan le 30 Zanvyè dan sa lannen kot sa bann *Estimates* i *apply*.

E sa bomaten ou'n dir nou Mr Speaker, ki ou'n resevwar ozordi. Alor nou konnen ki *Estimates* in fini ariv devan Lasanble e Gouvernman in *comply* avek son lobligasyon konstitisyonnel dan sa sans.

Me i *still* napa en Bidze. I *still* napa lotorizasyon pou depans larzan pou sa lannen ki pe vini. Konstitisyon ankor enn fwa i prevwar ki sa pou arive, detanzantan, e i dir ki si sa i arive e ki Bidze pa ankor ganny aprouve e i annan bokou rezon

akoz Bidze pa pou ganny aprouve, kekfwà i annan eleksyon parey in annan sa lannen, me in posib ki deba i kontinyen e i *spill over* e Lasanble pa kapab ariv lo en konsansis pou donn en Bidze Gouvernman tre posib ki sa i arive.

Konstitisyon i prevwar ki dan sa ka dan ka kot nou pa kapab ganny en Bidze atan, Lasanble i kapab otoriz Gouvernman par en rezolisyon Lasanble pou depans en serten sonm larzan pou sa premye 4 mwan dan sa lannen kot i bezwen depans larzan.

E pou fer sa, osito ki lannen i konmanse, Gouvernman in bezwen vin devan Lasanble lo en Mosyon parey mon fek propoze bomaten, pou demann avek sa Lasanble, otoriz depans en serten sonm larzan pou sa premye 4 mwan, pou li kontinyen fonksyonnen, an atandan ki deba lo Bidze deba lo *Appropriation Act* i ganny fer e ki Lasanble i donn Gouvernman en Bidze pou sa lannen.

E donk ozordi sa ki nou pe fer se konsider sa demann pou depans R2.611bilyon, pou sa 4 mwan ki pe vini. E sa bann keksoz ki mon fek dir i sorti dan

Lartik 154 e 155 nou Konstitisyon.

154 i prevwar kisisa bann *Estimates* ki bezwen ganny depoz devan Lasanble. E 154 (1) i li menm li ki dir ki sa i fodre ganny fer avan le 30 Zanvye dan sa lannen. E 154 (3) i donn en lalis tou sa ki devret enkorpoire dan sa bann *Estimates*. E i en long lalis. Det Leta, det avek Labank Santral, rezerv, *fiscal outcome* eksetera, eksetera. Epi 154 (4) *estimates of expenditure* ki bann larzan ki Gouvernman i espekte pran dan *Consolidated Fund*. Sa in ganny fer bomaten e i en gro travay e i en dokiman konpreansiv. Sa lannen in 777 paz longer.

Donk i en dokiman detaye. E i byen ki sa i bezwen ariv devan Lasanble, akoz si nou pou al vot lo okenn rezolisyon pou donn Gouvernman permisyon pou depans larzan an avans, fodre nou annan en lide koman en Lasanble, ki sityasyon bann *estimates* konbyen bann larzan Gouvernman i espekte pe anmase, e konbyen larzan Gouvernman i espekte pe depanse dan sa lannen.

Lartik 155 anba lekel sa Mosyon pe ganny propoze bomaten, son bi se demann avek Lasanble, *allow* Gouvernman depans en serten

sonm ki li in *estimate*, e dan ka in *estimate* R2. 611bilyon pou sa premye 4 mwan. Otoriz li depans *up to* sa sonm, ziska enn ant 2 keksoz i arive.

Swa nou ariv le 30 Avril, swa i annan en *Agreement* ki nou fer pou donn Gouvernman son Bidze. Setadir *Appropriation Act* i ganny pase. E parey nou konnen byento Minis pou vin devan nou, e nou pou debat lo Bidze.

E osito ki *Appropriation Act* i ganny i pase, sa mezir ki nou pe pran bomaten i tonbe, e se e Gouvernman prezan i depans larzan anba *Appropriation Act*.

Mon dir sa Mr Speaker pou en rezon e rezon selman. Sa larzan ki Gouvernman pe demann ou ozordi, e ki mwan dan sa Mosyon mon pe propoze ki nou adopte e ki nou vot sa larzan i en larzan ki pou sorti dan Bidze. I en davans ki nou les Gouvernman pran dan sa Bidze ki nou pou donn li. I pa en *supplementary* sa, i pa en sonm *in excess of* sa Bidze.

Sel keksoz ki nou pe demann ki Gouvernman pe demann nou fer ozordi ki mwan antan ki *Leader* Zafer Gouvernman dan sa Lasanble mon pe demann Lasanble fer, se otoriz Gouvernman pou depans R2.6bilyon ziska le 30

Avril oubyen ziska ki nou donn li son Bidze sa sonm larzan pou sorti dan sa Bidze ki nou pou donn li.

E *Appropriation Act* in sorti e si mon pa tronpe i pe demann en Bidze R11bilyon. Donk sel keksoz ki nou pe demande bomaten se ki nou otoriz Gouvernman ziska ler ki nou tonm dakor lo sa Bidze ki nou pou donn li pou depans *up to R2.6billion* ki pou sorti dan sa Bidze ki nou pou donn li.

Donk vwala Mr Speaker, mon ti krwar ti ava byen pou nou ganny en apersi global lo akoz nou pe fer sa ozordi, e dan ki konteks sa i sorti. Alor pou sa rezon mon pe demann avek bann Manm, *by all means* reponn sa Mosyon ki mon pe propoze. Me annan konsyans touzour, ki sel keksoz ki nou pe fer se ki nou pe demann Gouvernman depans en larzan dan sa Bidze. Ki klerman sa Lasanble pou donn li kekfw pa dan sa sonm ki pe demande nou pou donn li en sonm larzan otoriz li pou depans *up to* sa sonm ki dan sa Mosyon bomaten ziska ler nou'n aprouv son Bidze ki nou espekte pou ganny fer dan pou mwan *Fevriye or thereabouts* apre ki nou'n kapab debat.

Avek sa detrwa mo Mr Speaker, *I move in accordance*

with the Motion before the House. Mersi.

MR SPEAKER

Mersi Onorab, eski Mosyon i ganny segonde? Onorab Arissol.

HON SANDY ARISSOL

Mr Speaker mon krwar avek tou lesplikasyon ki Onorab Georges in donner lo sa Mosyon, mon propoze mon ti a kontan segonn Mosyon anmennen par Onorab Georges. Mersi bokou.

MR SPEAKER

Mersi. Onorab Georges eski ou pou kontinyen adres Mosyon apre *approval*, oubyen ou a pas leres soz? *Ok?* Tre byen okenn Manm ki le entervenir. Onorab Churchill Gill.

HON CHURCHILL GILL

Mersi Mr Speaker. Mr Speaker lesplikasyon i annord. I kler ki kot nou ete e mannyer keksoz in deroule dan pei depi lannen pase. E letan ki i annan lesplikasyon ki'n ganny donner i akseptab e kler.

Me selman pli enportan nou konsyan osi poudir i annan program ki bezwen ganny lasistans finansyel pou kontinyen, akoz nou konn sityasyon pei e i annan bann diferan dimoun deor, ki pe

depan lo desizyon ki nou pran la anndan, pou program kontinyen marse.

Alors nou krwar poudir i pa pou en problem pou nou kapab donn nou sipor pou asire ki sa bann program i ganny kontinyen, e tou bann lezot depans ki devret ganny fer, i ava ganny fer san okenn problem. E loperasyon pei i a kontinyen marse. Mersi.

MR SPEAKER

Mersi. Onorab Loze.

HON JOHAN LOZE

Mr Speaker mersi ankor enn fwa pou laparol. Mr Speaker sa ki kler pou nou lo sa kote latab se ki fonksyonman Gouvernman Leta Sesel i bezwen kontinyen marse.

I annan tro bokou ki depan lo Bidze Leta Sesel pou annan okenn obstriksyon dan sa fonksyonman, so nou lo nou kote latab nou pou zwe nou rol fer nou bout, e aport sa eleman travay ansanm pou nou pas sa ki Gouvernman pe demande ozordi.

This being said i osi i bezwen ganny dir ki nou le fer li kler, ki an aprouv an sa R2 milyon la, nou le fer li kler avek Gouvernman, nou pa pe donn zot okenn leskiz, pou personn

pa ganny peye anba okenn program Gouvernman!

Nou pe aprouve a kondisyon ki tou dimoun ki annan en lekspektasyon normal, lozik e rasyonnel pou ganny peye diran sa mwan i ganny peye silvouple, ant la ziska le 30 Avril. Se sa ki nou, nou pe siporte. Nou pe siport Se..sel..wa ki dan travay ki annan Kontra, ki pe espekte en serten sonm larzan avek Gouvernman Sesel.

Mr Speaker mon krwar ozordi i fer dezyenm morso travay ki vin devan nou Lasanble ki fer laprev sa eleman travay ansanm, kot menm si nou annan diferans politik e semenn prosen si Bidze i vini nou pou annan letan pou nou debat lo nou dan bann diferans, nou a fer li. Be i enportan egalman pou nou Nasyon konnen konpran e rekonnnet konmkwa ki letan in ariv ler pou nou ankor, parey mon'n dir bomaten fer sa ki bon e sa ki byen pou Lepep Seselwa, nou met tou diferans de kote e nou fer li, *regardless* ki kote latab ki nou asize, ki nou *background* e ki diferans nou kapab annan antre ek kanmarad.

Nou poz tou de kote e nou fer le neser pou nou pep! E sa i lespri ki devret gid 2021 isi Sesel *regardless who you are*,

kote ou ete, Se..sel..wa i devret premye dan tou konsiderasyon. Mersi Mr Speaker.

MR SPEAKER

Mersi. Onorab. Onorab Pillay.

HON SEBASTIEN PILLAY

Mersi Mr Speaker. Mr Speaker mon krwar mon bann koleg lo sa kote latab in fer kler ki manner ki pozisyon nou pe pran. Le pwen in ganny fer ki nou sa ki esansyel se ki napa okenn leskiz prezan pou fer okenn dimoun pa ganny peye oubyen pa ganny en loportinite, pou fer sir ki i annan en lasyet manze pou met lo son latab. E ki Gouvernman i kapab kontinyen fonksyonnen, akoz i annan en kantite keksoz ki depan lo fonksyonman Gouvernman.

E ki parey taler ler nou'n abor sa size an se ki konsern sa lamannman dan Prozedlwa pou *Public Health Act*, e lapros ki nou'n pran se ki en keksoz ki bon e ki neserer pou Sesel a sa moman la nou pou kontinyen donn li nou sipor, e nou pou kontinyen travay ansanm.

E sa i ava osi en si oule en legzanp en mirwar dan parfwa, en persepsyon ki ganny kree. Ki en kote i kont en kote i pour, akoz sa ki mon ti ava, anvi bomaten se ki nou kapab, pas

sa Mosyon an inanim akoz nou pa dan en leta normal.

Premye fwa ki nou ti fer en tel prosedir sete an 2017, si nou apel byen. Me sa letan nou ti'n deza fini konmans antre dan prosesis Bidze. Ozordi nou pe fer li pa akoz in annan retar dan antre prosesis Bidze, be akoz in annan en reel lenpak lo nou pei pa zis *from* pwennvi ekonomik me lo pwennvi lasante ki in aret tou keksoz.

E ki a sa moman i pa letan pou nou fer politik popilis, *nor* politik bonmarse. Me sa ki reste pou nou dir se ki i enportan ki mon'n ganny sans regard dan sa *Appropriation Act* vi ki nou'n ganny li bomaten mon'n ganny regarde. Mon'n vwar ki i annan en kantite larzan ki pe ganny mete dan diferan antite.

E sa i pou fer ki ler Minis Finans pou vini, i pou bezwen osi eksplik nou ki manner sa larzan ki nou pe donn Gouvernman konman ou kapab apel sa konman en davans, pou ganny enkorpoze dan sa Bidze final. E ki nou ava annan en *oversight* lo la pou fer sir ki sa larzan *for the purpose* ki nou pe vot li la ozordi i ganny servi pou sa *purpose!*

Akoz konman en Lasanble sa ki nou bezwen toultan e sey asire. E mon krwar mon pou

difere lo en pwen avek Onorab Georges se ki mon konpran lartik 155 ou dir ki sa Mosyon li menm i *standalone* e alors i bezwen annan serten bagaz ki vin avek serten detay ki vin avek.

E mwan mon pou donn mon sipor sa Mosyon, akoz a sa moman nou bezwen ki fonksyonman Gouvernman i kontinyen. E nou tou ki la anndan i annan dimoun ki ekrir nou, i annan dimoun ki koz ek nou, i annan dimoun ki kontakte nou, mwan en pti pe plis petet.

E i neserer ki nou kapab rann lapel dan sa e alez en pti pe sa lenkyetid. Parey nou'n fer bomaten avek sa Lalwa lo *Public Health*. Ankor enn fwa parey la pou montre poudir konman Lasanble nou pe regard pei de pre nou pe swiv sa ki pe pase de pre. E ki nou pou toultan a kote Seselwa dan tou moman, menm ler i difisil. E dan botan nou ava aplodi me ler i difisil nou ava solider ansanm pou nou kapab *overcome* bann sityasyon ki prezant devan nou.

So Mr Speaker avek sa mon krwar nou napa rezon kan ti fer gran deba lo sa size. Nou kapab Lasanble aprouv sa Mosyon e la bann Manm i ava konmans regard detay sa *Appropriation Act* ki nou'n

gannyen. Depouy li dan tou fason regard lo pwennvi nou bann distrik, bann ki'n elekte direkteman. Regard lo pwennvi bann keksoz ki bann dimoun i met a nou latansyon. E pou nou kapab fer e deba pli enformen en deba pli aprofondi lo diskour Bidze ki Minis i ava prezante tre byento.

Mon remerci ou. Mon vremen remerci Lasanble pou son latansyon Mr Speaker.

MR SPEAKER

Mersi Onorab. Onorab Georges ou anvi fer okenn konklizyon oubyen nou a pas lo vot.

HON BERNARD GEORGES

Non .

MR SPEAKER

Onorab Henrie. Eskiz mwan.

HON GERVAIS HENRIE

Mersi Mr Speaker. Mon ti'n lev mon lanmen pou mon dir en pti mo lo sa Mosyon prezante par *Leader of Government Business*.

Mon apresye pozisyon ki Parti Lopoziyon in pran bomaten. Parske nou bezwen dan sa sityasyon vin avek en pozisyon komen pou ki pei i bouze. An dizan sa pou benefis bann dimoun ki pe ekout nou deor, nou bezwen pran kont pou dir i pa vedir sa sonm ki la

i kekpar. I kekpar dan pei. I pa la li.

Sa larzan i bezwen ganny prodwir. Setadir mesaz ki pe ganny anvoye, nou tou nou bezwen travay, travay dir, travay konsyansyezman. Akoz Gouvernman li dabor i bezwen ranmas sa bann larzan atraver, *tax*, diferan form *tax*. I annan *personal income tax* ki tire lo nou saler tou le mwan, i annan bann pti *tax* ki lo nou *saving* ki nou gannyen dan labank, i annan sa ki nou apel *excise tax* savedir i pey lo sak lit *fuel* ki nou aste i annan en *tax* ki nou peye, lo loto si nou fer vini. *VAT*. So i annan diferan fason. *Dividend* ki bann lakonpanyen i pey Gouvernman ki pou li, bann ki peye mon mazine la, par egzanp *Land Marine, FSA, Port Authority*. So koumsa Gouvernman i anmas sa larzan li.

Be sa larzan i bezwen ganny prodwir. Alor annou retire dan latet poudir i la, e ki keksoz i normal nanryen pa'n sanze. Non, non, non mesaz ki nou pe dir depi Lendi dan nou repons lo Leta Lanasyon se ki nou pe fer fas avek bann defi parey *COVID-19*, drog, koripsyon, mank performans lo lapar bann serten travayer dan sekter piblik.

Donk nou pou bezwen travay, travay pli dir pou nou kapab remet pei lo sa semen performans ekonomik. E mesaz i reste ki nou pou bezwen fer serten re striktirasyon, eliminasyon dan sa ki pa esansyel pou koup sa ki nou pa kapab ou nepli kapab *afford*, pou tir politik dan servis piblik, pou atak drog avek koripsyon, e pou demann sanzman mantalite dan sakenn antre nou pou nou kapab viv dapre nou mwayen onnetman anba Lalwa.

Donk sa mesaz, nou bezwen travay, travay dir pou prodwir sa sonm ki nou pe permet Gouvernman pou otoriz Gouvernman pou servi, e koumsa alor ki nou kapab retourn dan en lavi normal osito osi. Mersi Mr Speaker.

MR SPEAKER

Mersi. *LGB*.

HON BERNARD GEORGES

Mersi Mr Speaker. Mr Speaker mon ti ava osi kontan remerisi tou dimoun ki'n pran laparol bomaten, sirtou bann Manm lo lot kote latab pou zot pozitivite ek zot pragmatizm dan lafason ki zot in abord sa size.

Nou pou annan definitivman loportinite pou debat a plen lo Bidze ler i vini, e

mon konsyan ki sete a sa moman kot vre travay pou ganny fer, lo bann landrwa kot Gouvernman pe anmas larzan, bann landrwa kot Gouvernman pe al depanse.

Mon ti a kontan zis azout en pti keksoz avek sa ki Onorab Gervais Henrie in dir. Dan tou Bidze Mr Speaker i annan de konponan. Enn se *income*, enn se *expenditure*.

E ler nou fer en Bidze kot nou, nou azout lapey ki msye i gannyen, lapey ki madanm i gannyen e nou lot kote nou regarde *loan* lakaz pou peye, konbyen nou pou depanse lo manze eksetera lo *fuel*, e nou sey balanse.

Me annan serten ka kot par neseseite *income* pa osi o ki depans. E sa i ariv dan tou Bidze. I annan 2 zanfan ki bezwen pey lekol oubyen in al liniversite *or whatever* e ki fors sa paran *whatever*, apwent larzan pou zot balans zot Bidze. Se sa e se sa en sistenm Bidze. Ou bezwen regarde avan ki sa ki ou depans esansyel ki ou pa kapab koup lo la. Epi rod lafason ki ou pou balans sa avek larzan ki ou prodwir atraver travay dir parey Onorab Henrie in dir. Atraver en doub travay si ou posibil, me si ou bite ou pou bezwen al *borrow* sa avek en labank *or whatever* e

nou tou nou bezwen nou konsyan ki sa i arive. Nou tou nou bezwen *borrow* larzan parske en lakaz par egzanp. Akoz ler nou aste en lakaz personn napa sa kantite larzan pou li kapab depoze e donk *borrowing* i vin bann fakter.

E mon krwar ler nou ariv lo Bidze nou pou vwar ki se sa, sa legzersis ki sa ladministrasyon in fer. In sey *strip* depans otan ki posibil pou anmenn li minimonm, e prezan i pou bezwen al rod sa larzan atraver tou sa bann landrwa ki mwan avek Onorab Gervais Henrie nou'n mansyonnen bomaten, me si i annan en mankman i pou bezwen al ver en lenstitisyon pou *borrow* larzan pou ki Bidze i ganny balanse.

Se sa ladiferans parey nou konnen ant en Bidze defisiter e en Bidze ki balanse. E donk sa nou ava ganny deba nou ava ganny letan pou debat lo la ler nou ariv lo Bidze.

E finalman mon ti a kontan *remind* Lasanble e mon vwar ki mon bann koleg lo lot kote latab in sezi sa nide, mon konnen zot pou sezi li ankor ler nou ariv lo Bidze. Se ki i annan en pratik sa Lasanble e lezot Lasanble osi sirtou sa Lasanble i en Konvansyon si ou anvi Mr Speaker ki ou pa *deny* en

Gouvernman en Bidze, akoz nou tou nou konsyan parey zot in dir Onorab Loze in mansyonn sa, dan son lentervansyon, nou tou nou konsyan ki en Gouvernman ki ou kontan li ki ou pa kontan li, i bezwen administre pei e i bezwen larzan pou administre pei.

Donk ou pa *deny* li en Bidze. Kekfwa ou pa ava aprouv son Bidze, kekfwa ou *abstain* me Konvansyon se ki ou pa *deny* en Gouvernman en Bidze.

Mon konnen si nou pe al dan sa direksyon avek lafason ki mon'n tann mon bann koleg koze bomaten.

Donk Mr Speaker. Mersi pou loportinite ki ou'n donn mon pou reponn sa bann lentervansyon bomaten e mon remersye zot pou lefet ki tou dimoun in promet pou siport sa Mosyon. Mersi bokou.

MR SPEAKER

Onorab Georges mon ti a kontan zis lir Mosyon avan nou pas lo vot.

HON BERNARD GEORGES

Yes Mr Speaker Mosyon devan nou i lir koumsa e nou pe al vot lo la. *In accordance with Article 155 of the Constitution, the National Assembly resolves to authorise the withdrawal of*

R2,611,787,886.75 from the Consolidated Fund for the purpose of meeting expenditure necessary for the service of Government until 30 April 2021. Mersi Mr Speaker.

MR SPEAKER

Mersi nou a vot lo sa Mosyon. Tou bann ki an faver lev lanmen silvouple. Mersi okenn ki kont? Non. Mosyon anba Konstitisyon anba Lartik 155 in ganny aprouve avek 33 vot pour 0 vot kont e 0 abstansyon. Mersi. Mosyon in pase.

Avan nou terminen konman mon annan en pti moman disponib mon ti a kontan pran lokazyon pou adres kestyon ki Onorab Pillay ti poz mon yer lo size si ou kapab servi en serten mo dan Lasanble.

E mwan mon anvi dir sa mo ki Onorab William ti servi pa 'kouyonn' mwan napa okenn sans ki i vilger dan li menm. I en mo ki ganny servi dan langaz kouran e i ganny aksepte.

So san ki mon konnen ki egzaktaman bann detay langaz Parlmanter, mon le fer sa repons pirman lo en pwen *layman* en pwen dimoun ordiner ki sa mo i kapab ganny aksepte dan Lasanble e dan sosyete.

E annefe en Manm ki travay avek Lenstitisyon Kreol in ekri mwan pou dir mon poudir sa mo pa enkli dan lalis mo vilger dan leksik Kreol, ki en pe nou gid ofisyel lo lalang Kreol.

Selman sepandan mon a dir avek sa, ki i rekonnèt dan lalang ki i annan serten mo ki ou servi dan serten lokazyon e ou pa servi li dan lot. E sa mo son problem i se ki osi asosye avek serten lezot mo, avek menm rasin ki kapab vilger. I annan sa e Onorab Loizeau osi ti servi en lot mo li osi ki en pe apepre menm soz.

Apre en keksoz avek sa mo se ki i annan lezot mo ki pli *soft*, ki dir menm zafer. Alor ler ou servi sa ou pe fer en pwèn spesyal i en mo bokou pli for ki lezot mo par egzanp ‘anbete’ i ti kapab servi.

Pa anpes ou servi li me selman mon krwar sa ki montre i se ki ler ou servi sa ou pe montre ou pe servi en langaz grannwanr. I ti pou drol pou tann en manrmay pou dir sa mo. Me selman avek en granmoun nou aksepté.

So e les mon dir, les mon dir dan mon konnesans lo bann lengwistik, se ki i annan en kantite langaz kot serten mo i kapab servi pa en gran dimoun,

e i pa kapab ganny servi par en manrmay. So sa i arive.

Alor avek sa, sel keksoz ki mon a dir se ki i pa en mo ki en Manm i devret pe servi tou letan. Akoz si ou pe servi sa tou letan se ki ou pe montre konmsi ou pe *show-off*, ou pe montre ou pli grannwanr ou kapab servi tou sa bann mo. I pa en mo ki ou devret servi tou letan, selman si i pase i mon krwar ... E apre sa ki mal avek en kantite mo se i pa telman mo li menm. Me lentonasyon ek lentansyon ki ou servi li avek. E sa osi i annan en pwèn kot ou devret evite. *Ok* Onorab Pillay? Ou dakor ou pa dakor?

HON SEBASTIEN PILLAY

Mr Speaker, *from* en edikater *to another* mon byen kontan ou lesplikasyon ki ou’n fer. Mon annan gran respe pou ou.

Selman konman en Manm ki’n dan Lasanble pou en pe letan e mon konnen ou bann koleg lo lot kote latab taler petet zot ava aprozé ou zot ava dir ou, pou mwan sa ki ou’n dir i byen *ok*? Me solman Lasanble i annan en rol li i annan en rol kot en kantite dimoun i get nou, e zanfan i get nou. Demen ou pa ti a kontan ki en zanfan malgre ou pe dir li sa, i servi sa mo me i dir ou sa in ganny servi. I pa sa ou lentansyon

mon konnen. Mon pa pe dir sa ou lentansyon.

Me ou'n eksplike kot sa mo in sorti. Mwan mon ti ava enplor ou Mr Speaker ki dan nou langaz dan nou parlans Parلمانter, pa admet serten mo ki pou zis anmenn nou ver en direksyon pou dezenere dan en deba lo *whether* en mo i ganny servi.

Nou deza pe kapab servi sa bann mo, mon pa'n zanmen tann Onorab Georges servi sa mo e li i en dimoun ki mon annan gran respe pou li aköz son leksperyans dan Lasanble.

Onorab Arissol malgre tou son lentonasyon e tou son pasyon zanmen in deza servi sa mo. Onorab Woodcock enn bann Manm ki kontan koz veneman dan Lasanble zanmen in deza servi sa mo, Onorab Henrie zanmen in deza servi sa mo, Onorab Loizeau rarman i servi sa bann mo. Si in servi sa enn ti en pti *slip*.

So pou mwan Mr Speaker avek ou lesplikasyon mon ti ava enplote ki sa mo nou pa admet li. Me parey ou'n dir si sa i en desizyon ki Lasanble i anvi pran mwan mon pou respekte.

MR SPEAKER

Mersi. Mersi bokou. I enteresan ki mo li osi ganny enterprete dapre karakter

dimoun. E nou kontan nou konnen poudir Onorab William i en boug poli toultan e i koz dousman. So nou a les li la. Mersi pou zot latansyon e mersi pou ekout mwan lo sa pti disertasyon lengwistik.

Avek sa nou a terminen pou ozordi e nou a rebran travay Mardi prosen. Mersi.

(ADJOURNMENT)